

摘藻堂四庫全書薈要

史部

欽定四庫全書薈要

史部

通志卷一百五十六



詳校官員外郎臣楊世綸

欽定四庫全書薈要卷九千七十四

史部

通志卷一百五十六

宋右廸功郎鄭樵漁仲撰

傳第六十九

後周

賀拔勝

弟岳

寇洛

趙貴

從祖兄善

李賢

弟遠植

遠子植弟基

梁

禦

李弼

子暉弟擢

于謹

子實翼

實子翼子璽

翼子顗

實弟翼弟義

宇文

貴

侯莫陳崇

兄順

王雄

子謙

王盟

子勳勳弟懋

獨孤信

竇熾

兄子

賀蘭祥

叱列伏龜

閻慶

史寧

子雄

權景宣

王羆

孫述

王思政

尉遲迴

弟綱子綱

王軌

樂運

賀拔勝字破胡神武尖山人也祖爾頭徙家武川父度
拔武川軍主正光末爲懷朔統軍卒贈肆州刺史兄允
太尉侍中燕郡王允自有傳勝少有志操善左右馳射
北邊莫不服其膽畧衛可壞之圍懷朔勝時亦爲軍主
從父度拔鎮守旣被圍經年而外援不至勝乃慷慨白

鎮將楊鈞請告急於大軍鈞許之乃募勇敢少年得十餘騎夜潰圍而出賊追及之勝曰我賀拔破胡也賊不敢逼至朔州告急於臨淮王元彧辭氣壯烈彧義之許爲出師勝還報命復突圍而入賊追之射殺數人至城下大呼曰賀拔破胡與官軍至矣城中納之既而大兵不至鈞復遣勝出覘武川武川已陷勝乃馳還報懷朔懷朔亦潰勝父子俱被虜尋度拔與德皇帝合謀襲殺可瓌衆令勝馳告朔州未反而度拔與鐵勒戰沒刺史

費穆奇勝才畧厚禮留之委以兵事時廣陽王深在五
原爲破六韓賊所圍召勝爲軍主以軍功拜統軍又隸
僕射元纂鎮恒州時有鮮于河胡擁朔州流民南下爲
寇恒州城人應之勝與兄允弟岳相失南投肆州允岳
投爾朱榮榮與肆州刺史尉慶賓構隙引岳攻肆州城
陷得勝大悅曰吾得卿兄弟天下不足平也勝兄弟三
人遂委質事榮時杜洛周阻衆幽定葛榮據有冀瀛榮
謂勝曰井陘險要我之東門意欲屈君鎮之何如勝曰

少逢兵亂險阻備嘗每思効力以報知己今蒙驅策實
所願也榮乃表勝爲鎮遠將軍領步騎五千鎮井陘以
所乘馬并銀鞍遺之孝昌末從榮入洛以預定策立魏
孝莊帝功封易陽縣伯累遷撫軍將軍後元天穆北征
葛榮大破之時杜洛周餘燼韓樓在薊城結聚以勝爲
大都督鎮中山樓讐勝威名竟不敢南寇元顥入洛陽
孝莊出居河南榮徵勝爲前軍大都督與爾朱兆自硤
石度大破顥軍禽其子冠受遂前驅入洛陽遷武衛將

軍進爵真定縣公及榮死勝乃與田怡等奔赴榮第時
宮殿之門未加嚴防怡等議即攻門勝止之曰天子既
行大事必當更有奇謀吾衆旅不多何可輕爾怡乃止
及世隆夜走勝隨至河橋勝以爲臣無讐君之義遂勒
所部還都莊帝大悅仲遠逼東郡詔以本官假驃騎大
將軍東征都督率騎一千會鄭先護討之爲先護所疑
置之營外人馬未得休息俄而仲遠至與戰不利降之
復與爾朱氏同謀立節閔帝以功拜右衛將軍及爾朱

氏將討齊神武度律自洛陽兆自并州仲遠自滑臺三
帥會鄴時勝從度律度律與兆不平勝以臨敵構隙取
敗之道與斛斯椿詣兆營和解之反爲兆所執度律大
懼引軍還兆將斬勝數之曰爾殺可瓌罪一也天柱薨
後不與世隆等俱來而東征仲遠罪二也我欲殺爾久
矣勝曰可瓌作逆勝父子殺之其功不小反以爲罪天
柱被戮以君誅臣勝寧負王不負朝廷今日之事死生
在王但去賊密邇內構嫌隙自古迄今未有不破亡者

勝不憚死恐王失策兆乃捨之勝既免行百餘里方追及度律齊神武既克相州兵威漸盛爾朱兆及天光仲遠度律等衆十餘萬陣於韓陵兆率鐵騎陷陣出齊神武後將乘其背而擊之度律惡兆之驍悍懼其陵已勒兵不進勝以其兄弟攜貳遂率麾下降齊神武度律軍以此恐退遂大敗太昌初以勝爲領軍將軍尋除侍中魏孝武帝將圖齊神武以勝弟岳擁衆關西欲廣其勢援乃拜勝爲都督三荆三郢南襄南雍等七州諸軍事

進位驃騎大將軍荊州刺史開府儀同三司南道大行
臺尚書左僕射勝攻拔梁下澁戍禽其戍主又使人誘
動諸蠻皆率其種落歸款漢南大駭又禽梁將莊思延
攻馮翊安定沔陽並平之梁武帝勅其子雍州刺史續
曰賀拔勝北間驍將爾宜慎之勿與爭鋒續還城守不
敢出尋進位尚書令進爵琅邪郡公及齊神武與魏孝
武帝有隙詔勝引兵赴洛至廣州猶豫未進而帝已率
所領西赴關中勝還軍南陽遣右丞陽休之奉表入關

又令府長史元穎行州事勝自率所部將西赴關中進至淅陽詔授勝太保錄尚書事聞齊神武已平潼關禽毛鴻賓勝乃還荊州州人鄧誕執元穎引齊師時神武已遣行臺侯景大都督高敖曹赴之勝敗中流矢以百騎南奔梁在江表三年梁武帝遇之甚厚勝乞師北討齊神武既不果乃求還梁武帝許之親餞於南苑勝自是之後每執弓矢見鳥獸南向者皆不射之以申懷德之意既至長安詣闕謝罪孝武握勝手歔歔久之曰初

平西徙永嘉南度漢晉皆爾事乃關天非公之咎也乃授太師從文帝禽竇泰於小關又從攻弘農下河北禽郡守孫晏又從破東魏軍於沙苑追奔至河上乃與李弼別攻河東畧定汾絳河橋之役勝大破東魏軍文帝令勝收其降卒而還及齊神武攻玉壁勝以前軍大都督從文帝見齊神武旗鼓識之乃募敢勇三千人配勝以犯其軍勝與神武相遇連叱而字之曰賀六渾賀拔破胡必殺汝也時募士皆用短兵接戰勝持稍追神武

數里刃垂及之神武汗流氣殆盡會勝馬爲流矢所中
死叱副騎至神武已逸去勝歎曰今日之事吾不執弓
矢者天也是歲勝諸子在東者皆爲神武所害勝憤恨
因動氣疾大統十年薨于位臨終手書與文帝曰勝萬
里杖策歸身闕庭冀望與公埽除逋寇不幸殞斃微志
不申願公內先協和順時而動若死而有知猶望魂飛
賊庭以報恩遇矣文帝覽書流涕久之勝長於喪亂之
中尤工武藝走馬射飛鳥十中五六文帝每云諸將對

敵神色皆動唯賀拔公臨陣如平常真大勇也自居重任始愛墳籍乃招引文儒討論義理性又通率重義輕財身死之日唯有隨身兵仗及書千卷而已初勝至關中自以年位素重見文帝不拜尋而自悔文帝亦有望焉後從文帝宴於昆明池時有雙鳬游池上文帝授弓矢於勝曰不見公射久矣請以爲歡勝一發俱中因拜文帝曰使勝得奉神武以討不庭皆如此也文帝大悅自是恩禮日重勝亦盡誠推奉焉贈太宰錄尚書事諡

曰貞獻明帝二年以勝配享文帝廟庭勝無子以弟岳子仲華嗣位開府儀同三司襲爵琅邪公大象末位江陵總管勝弟岳字阿斗泥少有大志愛施好士初爲太學生及長能左右馳射驍果絕人不讀兵書而闇與之合識者咸異之與父兄赴援懷朔賊王衛可瓌在城西三百餘步岳乘城射之箭中瓌臂賊大駭後廣陽王深以爲帳內軍主與兄勝俱鎮恒州州陷後投爾朱榮待之甚厚以爲都督每居帳下與計事多與榮意合榮與

元天穆謀入匡朝廷問計於岳曰今女主臨朝政歸近習盜賊蜂起海內沸騰吾累世受恩義同休戚今欲內除君側外清逆亂取勝之道計將安出對曰夫立非常之事必俟非常之人將軍士馬精彊位任隆重若首舉義旗伐叛匡救何往不克何向不摧古人云朝謀不及夕言發不俟駕此之謂矣榮與天穆相顧良久曰卿此言真丈夫之論也未幾而魏孝明帝暴崩榮疑有故乃舉兵赴洛配岳甲卒二千爲先驅至河陰榮既殺害朝

士時齊神武爲營軍都督勸榮稱帝左右欲同之榮未決岳進而言曰將軍首舉義兵共除姦逆功勤未立遽有此謀祇以速禍榮尋亦自悟乃尊立孝莊岳又勸榮誅齊神武以謝天下榮不從以定策功賜爵樊城鄉男授前將軍從榮破葛榮平元顥累遷左光祿大夫武衛將軍時万俟醜奴僭稱大號關中騷動朝廷深以爲憂榮將遣岳討之岳私謂其兄勝曰醜奴擁秦隴之衆足爲勍敵若岳往無功罪責立至假令克定恐讒慙生焉

勝曰汝欲何計自安岳曰請爾朱氏一人爲元帥岳副
貳之則可矣勝然之乃請於榮榮大悅遂以天光爲使
持節都督雍州刺史以岳爲衛將軍左廂大都督又以
征西將軍侯莫陳悅爲右廂大都督並爲天光之副以
討之時赤水蜀賊阻兵斷路天光之衆不滿二千及軍
次潼關天光頗有難色岳曰蜀賊草竊而公遲疑遇大
敵將如之何遂進軍戰於渭北破之軍威大振時醜奴
自圍岐州遣其大行臺尉遲菩薩僕射万俟行醜同向

武功南渡渭水攻圍趨柵天光遣岳率千騎赴援菩薩
攻柵已克率步騎二萬至渭北岳以輕騎數十與菩薩
隔水交言岳稱揚國威菩薩乃自驕令省事傳語省事
恃水應答不遜岳怒舉弓射之應弦而倒時已逼暮於
是各還岳於渭南傍水分精兵數十爲一處隨地形勢
置之明日將百餘騎隔水與賊相見且並東行岳漸進
前先所置騎隨岳而集騎既漸增賊不復測其多少行
二十許里至水淺可濟處岳便騎馬東出似欲奔遁賊

爲岳走乃棄步兵南度渭水輕騎追岳岳東行十餘里
依橫岡設伏兵以待之身先士卒急擊之賊便退走岳
號令所部賊下馬者皆不聽殺賊顧見之便悉投馬俄
而虜獲三千人馬亦無遺遂禽菩薩仍度渭北降步卒
萬餘醜奴尋棄岐州北走安定置柵於平亭天光方自
雍至岐與岳合勢軍於汧渭之間宣言曰今氣候漸熱
非征討之時待秋涼更圖進取醜奴聞之遂以爲實分
遣諸軍散農於岐州之北百里網川使其太尉侯伏侯

元進據險立柵岳知其勢分密與天光嚴備昧旦攻圍
元進柵拔之即禽元進自餘諸柵悉降醜奴棄平亭而
走欲向高平岳輕騎急追明日及醜奴於平涼之長阮
一戰禽之高平城中又執蕭寶寅以歸賊行臺万俟道
洛退保牽屯岳攻之道洛敗入隴投畧陽賊帥王慶雲
慶雲以道洛驍果絕倫得之甚喜以爲將天光又與岳
度隴至慶雲所居永洛城慶雲道洛俱出城拒戰並禽
之餘衆悉阮之死者萬七千人三秦河渭瓜涼鄯州咸

來歸款賊帥夏州人宿勤明達降復叛岳又討禽之天
光雖爲元帥而岳功居多加車騎將軍進爵爲伯尋詔
岳都督涇州刺史進爵爲公天光入洛使岳行雍州事
普泰初除都督岐州刺史進封清水郡公尋加侍中給
後部鼓吹進位開府儀同三司兼尚書左僕射隴右行
臺仍停高平後以隴中猶有土人不順岳助侯莫陳悅
所在討平之二年加都督雍州刺史天光將率衆拒齊
神武遣問計於岳岳報曰王家跨據三方士馬繁盛高

歡烏合之衆豈能爲敵然師克在和但願同心戮力耳
若骨肉離阻自相猜貳則圖存不暇安能制人如下官
所見莫若且鎮關中以固根本分遣銳師與衆軍合勢
進可以克敵退可以自全天光不從後果敗岳率軍下
隴赴雍禽天光弟顯壽以應齊神武及孝武帝即位加
關中大行臺永熙二年孝武密令岳圖神武遂刺心血
持以寄岳詔岳都督二十州諸軍事齊神武既忌岳兄
弟功名岳懼乃與文帝協契自詣北境安置邊防率衆

趣平涼西界布營數十里託以牧馬於原州爲自安之計先是費也頭万俟受洛干鐵勒斛律沙門解拔彌俄突紇豆陵伊利等部各擁衆自守至是皆款附秦南秦河渭四州刺史又會平涼受岳節度唯靈州刺史曹泥不應召通使於齊神武神武乃遣左丞翟嵩使至關中間岳及侯莫陳悅三年岳召侯莫陳悅會於高平將討曹泥令悅前驅而悅受神武密旨圖岳岳弗之知而又先輕悅悅乃誘岳入營共論兵事悅詐云腹痛起而徐

行令其壻元洪景斬岳於幕中朝野莫不痛惜之贈侍
中太傅錄尚書事都督關中二十州諸軍事大將軍雍
州刺史諡曰武壯翟嵩復命于神武神武下牀鳴其頰
曰除吾病者卿也何日忘之後岳部下收岳尸葬於雍
州北石安原葬以王禮子緯嗣拜開府儀同三司保定
中錄岳舊德進爵霍國公尚文帝女

寇洛上谷昌平人也累世爲將吏父延壽和平中以良
家子鎮武川因家焉洛性明辨不拘小節正光末以北

邊賊起遂從爾朱榮征討及賀拔岳西征洛與岳鄉里
乃募從入關禽万俟醜奴於長阮每力戰有功以功封
安鄉縣子及岳爲大行臺以洛爲右都督侯莫陳悅既
害岳欲并其衆時初喪元帥軍中惶擾洛於諸將之中
最爲舊齒素爲衆信乃收集將士志在復讐既至原州
衆咸推洛爲盟主統岳之衆洛自以非才乃固辭至平
涼與趙貴等迎文帝帝以洛爲右都督從討侯莫陳悅
平之拜涇州刺史魏天統初詔加開府進爵京兆郡公

加侍中封洛母宋爲襄城郡君與獨孤信復洛陽從文帝與東魏戰於河橋軍還洛率所部鎮東雍州五年卒於鎮贈驃騎大將軍太尉尚書令諡曰武子和嗣明帝二年錄舊勲以洛配饗文帝廟庭賜和姓若引氏改封松陽郡公

趙貴字元寶天水南安人也祖仁魏時以良家子鎮武川因家焉貴少穎悟有節概魏孝昌中天下兵起貴率鄉里避難南遷爾朱榮以爲別將討元顥有功賜爵燕

樂縣子從賀拔岳平關中累遷大都督及岳爲侯莫陳
悅所害將吏奔散莫有守者貴謂其黨曰吾聞仁義豈
有常哉行之則爲君子違之則爲小人朱伯厚王脩感
意氣微恩尚能蹈履名節况吾等荷賀拔公國士之遇
寧可自同衆人乎因涕泣歔歔於是從之者五十人乃
詣悅詐降悅信之因請收葬岳言辭慷慨悅壯而許之
貴乃收岳屍還營與寇洛等糾合餘衆奔平涼共圖拒
悅貴乃首迎文帝文帝至以貴爲大都督領府司馬悅

平行秦州事魏孝武西遷拜車騎大將軍後以預立魏文帝勲進爵爲公梁企定稱亂河右以貴爲隴西行臺討破之從復弘農戰沙苑拜侍中驃騎大將軍開府進爵中山郡公河橋之戰貴與怡峯爲左軍戰不利先還及高仲密以北豫州降周文迎之與東魏人戰於邙山貴爲左軍失律諸軍因此並却坐免官爵尋拜柱國大將軍賜姓乙弗氏六官建爲太保大宗伯改封南陽郡公如如寇廣武貴擊之斬首數千級收其輜重振旅而

還孝閔踐阼遷太傅大冢宰進封楚國公邑萬戶初貴
與獨孤信等皆與文帝等夷及孝閔即位晉公護攝政
貴自以元勲每懷怏怏與信謀殺護爲開府宇文盛告
被誅貴從祖兄善字僧慶少好學美容儀沉毅有遠量
爾朱天光討邢杲万俟醜奴以爲長史普泰初爲大行
臺尚書封山北縣伯天光拒齊神武於韓陵敗見殺善
請收葬其屍齊神武義而許之賀拔岳總關中迎善復
以爲長史岳爲侯莫陳悅所殺善共諸將翊戴文帝魏

孝武西遷改封襄城縣伯歷位尚書左右僕射進爵爲
公善性溫恭有器局雖位居端右而愈自謙退其職務
克舉則曰某官之力有罪責則曰善之咎也時人稱其
有公輔量大統九年從戰芒山屬大軍不利善爲敵所
獲卒於東魏建德初周齊通好齊人乃歸其柩其子詢
表請贈諡詔贈大將軍大都督四州諸軍事岐州刺史
諡曰敬

李賢字賢和自云隴西成紀人漢騎都尉陵之後也陵

沒匈奴子孫因居北狄後隨魏南遷復歸汧隴曾祖富
魏太武時以子都督討兩山屠各歿於陣贈寧西將軍
隴西郡守大統末以賢兄弟著勲追贈司空公祖斌以
都督鎮高平因家焉賢幼有志節不妄舉動嘗出遊逢
一老人鬚眉皓白謂曰我年八十觀士多矣未有如卿
卿必爲台牧努力勉之九歲從師受業畧觀大指而已
或譏其不精荅曰賢豈能領徒授業邪惟當粗聞教義
備已不足至於忠孝之道實銘於心問者慙服十四遭

父憂撫訓諸弟友愛甚篤魏永安中万俟醜奴據岐涇等州反孝莊遣爾朱天光擊破之天光令都督長孫邪利行原州事以賢爲主簿累遷高平令賀拔岳爲侯莫陳悅所害文帝西征賢與其弟遠穆等密應侯莫陳崇以功授都督仍守原州及大軍至秦州悅棄城走文帝命兄子導追之以賢爲先鋒至牽屯山及之以功授假節撫軍將軍大都督魏孝武西遷文帝令賢率騎迎衛封上邽縣公俄授左大都督還鎮原州大統二年州人

豆盧狼害都督大野樹兒等據州城反賢率敢死士一

戰敗之狼斬關遁走賢追斬之大統八年授原州刺史

文帝之奉魏太子西巡至原州遂幸賢第讓齒而坐行

鄉飲酒禮後文帝復至原州令賢乘輅車備儀服以諸

侯會遇禮相見然後至賢第歡宴終日凡是親族頒賜

有差恭帝元年進爵西河郡公後以弟子植被誅賢坐

除名保定二年詔復賢官爵仍授瓜州刺史初武帝及

齊王憲之在襁褓不利居宮中文帝令賢家處之六載

乃還宮因賜賢妻吳姓宇文氏養爲宗女賜與甚厚及武帝西巡原州幸賢第詔曰朕昔冲幼爰寓此州使持節驃騎大將軍開府儀同三司大都督瓜州諸軍事瓜州刺史賢斯土良家勲德兼著受委居朕導輔積年念其規弼功勞甚茂今巡撫屆此不殊代邑舉目依然益增舊想賢雖無屬籍朕處之若親凡厥昆季至于子姪可並預宴乃命中侍上士尉遲愷往瓜州降璽書勞賢賜衣一襲及被褥并御所服十三環金帶一要中廐馬

一匹金裝鞍勒雜綵五百段銀錢一萬賜賢弟申國公
穆亦如之子姪男女諸孫三十四人各賜衣一襲拜賢
甥庫狄樂爲儀同賢門生昔經侍奉者二人授大都督
四人授帥都督六人別將奴已免賤者五人授軍主未
免賤者十二人酬替放之四年王師東討西道空虛慮
羌渾侵擾乃授賢河州總管河州舊非總管至是創置
賢乃大營屯田以省運漕多設斥候以備寇戎於是羌
渾斂迹五年宕昌寇邊乃於洮州置總管府以鎮遏之

遂廢河州總管改授賢洮州總管屬羌寇侵擾賢頻破之虜遂震懾不敢犯塞俄廢洮州總管還於河州置總管府復以賢爲之武帝思賢舊恩徵拜大將軍於京師薨帝親臨哀動左右贈使持節柱國大將軍大都督十州諸軍事原州刺史諡曰桓子端嗣端位開府儀同三司從平齊戰沒贈上大將軍進封襄陽公諡曰果端弟吉儀同三司吉弟孝軌開府儀同大將軍升遷縣伯後封奇章公孝軌弟詢詢弟崇俱列在隋史賢弟穆傳中

賢弟遠字萬歲幼有器局嘗與羣兒爲戰鬪戲指麾便有軍陣之法郡守見而異之召使更戲羣兒散走遠持杖叱之復爲向陣意氣雄壯殆甚於前郡守曰此小兒必爲將帥非常人也及長涉獵書傳魏正光末天下鼎沸敕勒賊胡琮侵逼原州遠昆季率勵鄉人欲圖拒守而衆情頗有異同遠乃按劒喻以節義因曰有異同遠議者請斬之衆懼乃聽命相與盟軟深壁自守無援城陷其徒多被害唯遠兄弟並爲人所匿得免遠乃使賢

晦迹和光潛身間行入朝求援魏朝嘉之授武騎常侍
俄轉別將及爾朱天光西伐配遠精兵爲鄉導天光欽
遠才望除爲長城郡守後以應侯莫陳崇功遷高平郡
守文帝見而悅之令居麾下及魏孝武西遷封安定縣
伯魏文帝嗣位之始思享遐年以遠字可嘉令扶帝升
殿進爵爲公仍領左右從征竇奉復弘農並有殊勲授
都督原州刺史文帝謂遠曰孤之有卿若身之有臂本
州之榮乃私事耳遂令遠兄賢代行州事沙苑之役遠

功居最進爵陽平郡公尋除大丞相府司馬參軍國機
務時河東初復人情未安文帝以河東爲國之要領乃
授河東郡守遠敦獎風俗勸課農桑肅遏姦非兼脩守
禦之備曾未朞年百姓懷之文帝降書勞問徵爲侍中
遷太子少師東魏北豫州刺史高仲密請舉州來附文
帝以仲密所據遼遠難爲應接諸將皆憚此行遠曰北
豫遠在賊境高歡又屯兵河陽常理而論寔難救援但
不入虎穴不得虎子若以奇兵出其不意事或可濟脫

有利鈍故是兵家之常如其顧望不行便無克定之日
文帝喜曰李萬歲所言差彊人意乃授行臺尚書前驅
東出文帝率大軍繼至遠乃潛師而往拔仲密以歸仍
從文帝戰於芒山時大軍不利遠獨整所部爲殿尋授
都督義州弘農等二十一郡諸軍事遠善撫馭有幹畧
戰守之備無不精銳每厚撫境外之人使爲間諜敵中
動靜必先知之至有事泄被誅亦不以爲悔嘗獵於莎
柵見石於叢薄中以爲伏兔射之鏃入寸餘視之乃石

文帝聞而異之賜書曰昔李將軍廣親有此事公今復爾可謂世載其德東魏將段孝先趣宜陽以送糧爲名實有窺窬之意遠密知其計遣兵襲破之孝先遁走文帝賜所乘馬及金帶牀帳衣被等并綵二千疋拜大將軍頃之除尚書左僕射固辭文帝不許遠不得已方拜職文帝又以第十一子代王達令遠子之其見親待如此時文帝嫡嗣未建明帝居長已有成德孝閔處嫡年尚幼沖乃謂羣公曰孤欲立子以嫡恐大司馬有疑大

司馬即獨孤信明帝敬后父也衆未有答遠曰立子以嫡不以長畧陽公爲嗣公何疑焉若以信爲嫌請即斬信便起拔劍文帝亦起曰何事至此信又自陳說遠乃止於是羣公並從遠議遠出外拜謝信曰臨大事不得不爾信亦謝遠曰今日賴公決此大議六官建授小司寇孝閔踐阼進位柱國大將軍復鎮弘農遠子植文帝時已爲相府司錄參掌朝政及晉公護執權密欲誅護頗泄護乃出植爲梁州刺史尋而廢帝召遠及植還朝

遠恐有變沈吟良久乃曰大丈夫寧爲忠鬼安能作叛
臣乎遂就徵至京師護以遠功名素重猶欲全宥之謂
曰公兒遂有異謀可早爲之所乃以植付遠遠素愛植
植又有口辯云初無此謀遠信之詰朝將植謁護護謂
植已死乃曰陽平公何意自來左右云植亦在門外護
大怒曰陽平公不信我矣召入命遠同坐令帝與植相
質於遠前植辭窮謂帝曰本爲此謀欲安社稷利至尊
耳今日至此何事云云遠聞之自投於牀曰若爾誠合

萬死於是護乃害植并逼遠自殺建德元年晉公護誅
贈本官加太保諡曰忠隋開皇初追贈上柱國改諡曰
懷植及諸弟並加贈諡植弟基字幼和幼有聲譽美容
儀善談論涉獵羣書尤工騎射文帝令尚義歸公主以
父勲封建安縣公累遷大都督進爵清河郡公及魏廢
帝即位之後猜隙彌深時文帝諸子年皆幼沖章武公
導中山公護復東西作鎮唯託意諸壻以爲心膂基與
義城公李暉常山公于翼等俱爲武衛將軍分掌禁旅

魏帝深憚之故密謀遂泄魏恭帝即位進爵敦煌郡公
尋進位驃騎大將軍開府儀同三司拜陽平國世子六
官建授御正中大夫孝閔帝踐阼出爲浙州刺史尋爲
兄植合坐死以主壻又爲季父穆所請得免武成二年
除江州刺史既被譴謫常憂憤不得志保定元年卒於
位穆尤所鍾愛每哭輒悲慟謂所親曰好兒捨我去門
戶豈是欲興宣政元年追贈使持節上開府儀同大將
軍曹徐譙三州刺史敦煌郡公諡曰孝子威嗣威字安

人又改襲遠爵陽平郡公加上開府大象末進至柱國封公

梁禦字善通其先安定人也後因官北邊遂家於武川改姓爲紇豆陵氏高祖俟力提從魏太武征討位揚武將軍定陽侯禦少好學進趨詳雅及長更好弓馬爾朱天光西討知禦有志畧引爲左右共平關隴除鎮西將軍東益州刺史第一領人酋長封白水縣侯從賀拔岳鎮長安及岳遇害禦與諸將同謀翊戴文帝從征侯莫

陳悅文帝既平秦隴方欲引軍東下雍州刺史賈顯持
兩端通使於齊神武文帝知其意以禦爲大都督雍州
刺史領前軍先行既與顯相見因說之曰魏室陵遲天
下鼎沸高歡志在凶逆梟夷非遠宇文夏州英姿不世
算畧無方方欲持危定傾興復京洛公不於此時建立
功效乃懷猶豫恐禍不旋踵矣顯即出迎文帝禦遂入
鎮雍州大統元年進爵信都縣公尋授尚書右僕射從
文帝復弘農破沙苑加侍中開府儀同三司進爵廣平

郡公出爲東雍州刺史爲政舉大綱而已民庶稱之四年薨於州臨終唯以國步未康爲恨言不及家贈太尉尚書令雍州刺史諡曰武昭子睿列在隋史

李弼字景和隴西成紀人六世祖振慕容垂黃門郎父永魏太中大夫贈涼州刺史弼少有大志膂力過人屬魏亂謂所親曰大丈夫生世會須履鋒刃平寇難以取功名安能碌碌依階資以求榮位乎爾朱天光辟爲別將天光西討破赤水蜀以功封石門縣伯又與賀拔岳

討万俟醜奴万俟道洛王慶雲弼常先鋒陷陣所向披靡賊咸畏之皆曰莫當李將軍前也及天光赴洛弼隸侯莫陳悅爲大都督征討屢有克捷及悅害賀拔岳停軍隴上文帝自平涼進軍討悅弼諫悅令解兵謝之悅惶惑計無所出弼知悅必敗乃謂所親曰宇文夏州才畧冠世德義可宗侯莫陳公智小謀大豈能自保吾等若不爲計恐與同族滅及文帝至悅乃棄秦州南出據險以自固是日弼密通使於文帝許背悅至夜弼乃勒

所部云悅欲向秦州命皆裝束弼妻悅之姨也時爲悅所親委衆咸信之人皆散走弼慰輯之遂擁衆走秦州降文帝悅由此遂敗文帝謂弼曰公與吾同心天下不足平也破悅得金寶奴婢遂以好者賜之大統初進位驃騎大將軍開府儀同三司拜雍州刺史從文帝平竇泰先鋒陷敵斬獲居多文帝以所乘騅馬及竇泰所著牟甲賜之又從平弘農與齊神武戰於沙苑弼率軍居右而左軍爲敵所乘弼將其麾下九十騎身先士卒橫

截之敵分爲二因大破之以功進爵趙郡公四年又從
文帝東討洛陽弼爲前驅東魏將莫多婁貸文率衆至
穀城弼倍道而前進遣軍士鼓譟曳柴揚塵貸文以爲
大軍至遂走弼追斬貸文虜其衆傳首大軍翌日又從
文帝與齊神武戰於河橋弼深入陷陣身被七創遂爲
所獲弼陽殞絕於地守者稍懈弼睨其旁有馬因躍上
馳免歷位司空太保加柱國大將軍魏廢帝元年賜姓
徒何氏文帝西巡留弼居守後事皆諮稟焉六官建拜

太傅大司徒及晉公護執政朝之大事皆與于謹及弼等參議孝閔帝踐阼除太師進封趙國公邑萬戶前後賞賜鉅萬弼每率軍征討朝受命夕便引路畧不問私事亦未曾宿於家其憂國忘身類皆如此性沉雄有深識故能以功名終始頃之薨於位年六十四明帝即日舉哀比葬三臨其喪發卒穿冢給大輅龍旗陳軍至於墓所諡曰武尋追封魏國公配食文帝廟庭子曜居長以次子暉尚文帝女義安長公主遂以爲嗣暉初賜爵

義城郡公嘗卧疾暮年文帝憂之賜錢一千萬供其藥石之費魏恭帝二年加驃騎大將軍儀同三司出爲岐州刺史後文帝西巡率公卿子弟別爲一軍後襲趙國公改襲魏國公天和六年進位柱國建德初出爲梁州總管時隣州生獠積年侵暴暉至州綏撫並來歸附璽書勞之暉弟衍字拔立少專武藝慷慨有志畧爲義州刺史封真鄉公王謙作亂以行軍總管從梁睿擊平之進上大將軍隋開皇元年以行軍總管討平叛蠻進位

柱國後拜安州總管以疾還京卒子仲威嗣衍弟綸最知名有文武才用以功臣子少居顯職位至司會中大夫開府儀同三司封河陽郡公爲聘齊使主卒子長雅嗣尚隋文帝女襄國公主位內史侍郎河州刺史檢校秦州總管綸弟晏開府儀同三司趙郡公從平齊歿并州子憬以晏死王事即襲其官爵曜既不得嗣朝廷以弼功重封曜邢國公位開府子寬幹畧過人自周及隋數經將領位柱國蒲山郡公號爲名將弼弟擲字雲傑

長不盈五尺性果決有膽氣魏永安元年以統別將從
爾朱榮破元顥榮誅隨爾朱兆入洛及魏孝武西遷擿
從都督元斌之與齊神武戰敗遂與斌之奔梁後得逃
歸進封晉陽縣子尋爲文帝帳內都督從復弘農破沙
苑擿時跨馬運矛衝堅陷陣隱身鞍甲之中敵人見之
皆曰避此小兒不知擿之形貌正自如此文帝初亦聞
擿驍悍未見其能至是方嗟歎之謂曰但問膽決如何
何必要須八尺之軀也以功進爵爲公武成初從豆盧

寧征稽胡進爵汝南郡公出爲總管延綏丹三州諸軍事延州刺史卒官無子以弼子椿嗣位開府儀同大將軍右宮伯改封河東郡公寬子密列在隋史

于謹字思敬小名巨彌其先代人魏贈太尉新安公栗磾之六世孫也祖安定平原太守高平郡都將父子提隴西郡守茂平縣伯後以謹著勲贈太保建平郡公謹沈深有識量畧窺經史尤好孫子兵書屏居閭里未有仕進之志或有勸之者謹曰州郡之職昔人所鄙台鼎

之位須待時來吾所以優游鄉邑聊以卒歲耳太宰元
天穆見之歎曰王佐材也及破六韓拔陵首亂北境引
蠕蠕爲援遣大行臺僕射元纂討之纂宿聞謹名辟爲
鎧曹參軍事從軍北伐蠕蠕聞大軍之逼遂逃出塞纂
令謹率二千騎追之至郁對原前後十七戰盡降其衆
後率輕騎出塞覘賊屬鐵勒數千騎奄至謹以衆寡不
敵乃散其騎使匿叢薄間又遣人升山指麾若分部軍
衆賊望見雖疑有伏恃衆不以爲慮乃進軍逼謹謹以

常乘駿馬一紫一騮賊先所識乃使二人各乘一馬突陣而出賊以爲謹也皆爭逐之謹乃率餘軍擊其追騎賊走因得入塞正光四年行臺廣陽王元深治兵北伐引謹爲長流參軍謀議皆與謹參之特相禮接使其世子佛陁拜焉時魏末喪亂賊主斛律野穀祿等羣盜蜂起謹說廣陽王曰醜類蟻聚難以力勝願稟大王之威畧馳往喻之必得要領王然之謹兼解諸國語乃單騎入賊示以恩信於是西部鐵勒酋長也列河等三萬餘

戶並款附相率南遷廣陽與謹至析郭嶺迎接之謹曰
拔陵兵衆不少聞也列河等款附必來要擊彼若先據
險則難與爭鋒今以也列河等餌之當競來抄掠然後
設伏而待必指掌破之廣陽然其計拔陵果來要擊破
也列河於嶺上部衆皆沒謹伏兵發賊大敗悉收也列
河之衆魏帝嘉之除積射將軍孝昌元年謹又隨廣陽
王征鮮于脩禮軍次白斗牛邏會章武王爲脩禮所害
遂停軍中山侍中元晏宣言於靈太后曰廣陽王以宗

室之重受律專征今乃盤桓不進坐圖非望又有于謹者智畧過人爲其謀主風塵之際恐非陛下純臣矣靈太后詔於尚書省門外立榜募能獲于謹者許以重賞謹聞之乃謂廣陽王曰今女主臨朝取信讒佞脫不明白殿下素心便恐禍至謹請身詣闕下歸罪有司披露腹心廣陽王許之謹遂到榜下曰吾知此人衆共詰之謹曰我即是也有司以聞靈太后見之大怒謹備說廣陽忠款兼陳停軍之狀靈太后意解遂捨之孝莊即位

以從元天穆討葛榮平邢杲拜征虜將軍從爾朱天光
破万俟醜奴封石城縣伯後從爾朱天光與齊神武戰
於韓陵山天光敗謹遂入關文帝臨夏州以謹爲防城
大都督兼夏州長史及賀拔岳被害文帝赴平涼謹乃
說文帝曰魏祚陵遲權臣擅命羣盜蜂起黔首嗷然明
公仗超世之姿懷濟時之畧四方遠近咸所歸心願早
建良圖以副衆望文帝曰何以言之對曰關中秦漢舊
都古稱天府將士驍勇厥壤膏腴西有巴蜀之饒北有

羊馬之利今若據其要害招集英雄養卒勸農觀時適
變且天子在洛逼迫羣兇請都關右然後挾天子而令
諸侯千載一時也文帝大悅會有勅追謹爲關內大都
督謹因進都關中之策魏帝納之尋而齊神武逼洛陽
謹從魏帝西遷仍從文帝征潼關破回洛城授北雍州
刺史進爵藍田縣公大統元年拜驃騎大將軍三年大
軍東伐爲前鋒進拔弘農禽東魏陝州刺史李徽伯神
武至沙苑謹力戰進爵恒山郡公又從戰河橋拜大丞

相府長史兼大行臺尚書再遷太子太保卽山之役大軍不利謹率其麾下僞降立於路左齊神武乘勝逐北不以爲虞追騎過盡謹乃自後擊之敵人大駭獨孤信又集兵士於後奮擊齊軍亂以此大軍得全十二年拜尚書左僕射領司農卿及侯景款附請兵爲援謹諫以爲景情難測文帝不聽尋兼大行臺尚書大丞相長史率兵鎮潼關十五年加授華州刺史進位柱國大將軍賜鉅鬯一卣珪瓚副焉俄拜司空魏恭帝元年除雍州

刺史初梁元帝平侯景之後於江陵嗣位密與齊氏通使將謀侵軼其兄子岳陽王詒時爲雍州刺史以梁元帝殺其兄譽遂結讐隙據襄陽來附仍請王師乃令謹率衆出討文帝餞於青泥谷長孫儉問謹曰爲蕭繹之計將欲何如謹曰耀兵漢沔席卷渡江直據丹陽是其上策移郭內居民退保子城峻其雉堞以待援至是其中策若難於移動據守羅郭是其下策儉曰揣繹定出何策謹曰必用下策儉曰彼棄上而用下何也對曰蕭

氏保據江南綿歷數紀屬中原多故未遑外畧又以我
有齊之患必謂力不能分且繹懦而無謀多疑少斷愚
人難與慮始皆戀邑居既惡遷移當保羅郭所以用下
策謹乃令中山公護及大將軍楊忠等率精騎先據江
津斷其走路梁人豎木柵於外城廣輪六十里尋而謹
至悉衆圍之旬有六日外城遂陷梁主退保子城翌日
率其太子以下面縛出降尋殺之虜其男女十萬餘人
收其府庫珍寶得宋渾天儀梁日晷銅表魏相風烏銅

蟠螭趺大玉徑四尺圍丈二尺及諸輿輦法物以獻軍
無私焉立蕭咎爲梁主振旅而旋文帝親至其第宴語
極歡賞謹奴婢千口及梁之寶物并金石絲竹樂一部
別封新野郡公謹固辭不許又令司樂作恒山公平梁
歌十首使工人歌之謹以久當權軸位望隆重功名旣
立願保優閑乃上先所乘驄馬及所着甲鎧等文帝識
其意乃曰今巨猾未平公豈得獨善遂不受六官建拜
大司寇及文帝崩孝閔帝尚幼中山公護雖受顧命而

名位素下羣公各圖執政莫相率服護深憂之密訪於
謹謹曰夙蒙丞相殊眷情深骨肉今日之事必以死爭
之若對衆定策公必不得讓明日羣公會議謹曰昔帝
室傾危人圖問鼎丞相志在匡救投袂荷戈故得國祚
中興羣生遂性今上天降禍奄棄百僚嗣子稚幼而中
山公親則猶子兼受顧託今日軍國之事理須歸之辭
色抗厲衆皆悚動護曰此是護家事護雖庸昧何敢有
辭謹既與文帝等夷護每申禮敬至是謹乃起而言曰

公若統理軍國謹等便有所依遂再拜羣公迫於謹亦再拜因是衆議始定孝閔踐阼進封燕國公邑萬戶遷太傅太宗伯與李弼侯莫陳崇等參議朝政及賀蘭祥討吐谷渾明帝令謹遙統其軍授以方畧保定二年謹以年老表乞骸骨優詔不許有司宜斷表啓三年四月詔謹爲三老固辭又不許有司具禮擇日又賜延年杖武帝幸太學以食之三老入門皇帝迎拜屏間三老答拜有司設三老席於中楹南向太師晉公護升階設席

施几三老升席南面馮几而坐以師道自居大司寇楚國公寧升階正舄皇帝升立於斧扆之前西面有司進饌皇帝跪設醬豆親自袒割三老食訖皇帝又親跪授爵以醕有司徹訖皇帝北面立訪道三老乃起立於席皇帝曰猥當天下重任自惟不才不知治術之要公其誨之三老答曰木從繩則正君從諫則聖自古明王聖主皆虛心納諫以知得失天下乃安惟陛下念之又曰爲國之本在乎忠信古人去食去兵信不可失國家興

廢莫不由之願陛下存而勿失又曰爲國之道必須有
法法者國之綱紀不可不正所正在於賞罰若有功必
賞有罪必罰則爲善者日益爲惡者日止若有功不賞
有罪不罰則天下善惡不分下民無所措其手足又曰
言行者立身之基言出行隨誠願陛下慎之三老言畢
皇帝再拜受之三老答拜禮成而出及晉公護東伐謹
時有病護以其宿將舊臣猶請與同行詢訪戎畧軍還
賜鐘磬一部天和二年又賜安車一乘尋授雍州牧三

年薨年七十六武帝親臨詔譙王儉監護喪事賜綵千
段粟麥千斛贈本官加使持節太師都督雍恒等二十
州諸軍事雍州刺史諡曰文及葬王公以下咸送出郊
外配享於太祖廟庭謹有智謀善於事上名位雖重猶
存謙挹每朝參往來不過兩三騎而已朝廷凡有軍國
之務多與謹決之謹亦竭其智能弼諧帝室故功臣之
中特見委信始終若一人無閒言每教訓諸子務在靜
退加以年齒遐長禮遇隆厚子孫繁衍皆至顯達當代

莫比子寔嗣寔字賓實少和厚年未弱冠入文帝幕府
從征累功封萬年縣子大統十四年累遷尚書是歲文
帝與魏太子西巡寔時從行文帝刻石隴山之上叙錄
功臣名位以次鐫勒預以寔爲開府儀同三司至十五
年方授之尋除渭州刺史特給鼓吹一部進爵爲公魏
恭帝二年羌東念姐率部落反西連吐谷渾大將軍豆
盧寧討之踰時不克又令寔往遂破之文帝手書勞問
賜奴婢百口馬百匹孝閔帝踐阼授戶部中大夫進爵

延壽郡公天和二年延州蒲川賊郝三郎反攻丹州遣
寔討平之仍除延州刺史五年襲燕國公進位柱國以
罪免尋復本官除涼州總管大象二年加上柱國拜大
左輔隋開皇元年薨贈司空諡曰安子顓字元武身長
八尺美鬚眉大冢宰宇文護見而器之以女妻之以父
勲賜爵新野郡公歷左右宮伯郢州刺史大象中以水
軍總管從韋孝寬經畧淮南尉遲迴之反時總管趙文
表與顓素不協顓將圖之因卧閣內詐疾文表獨至顓

殺之文表與迴通謀其麾下無敢動者時隋文帝以迴未平慮顓復生邊患因宥免之即拜吳州總管以顓敗陳師賜綵數百段及隋受禪文表弟詣闕稱兄無罪上令按其事太傅竇熾等議顓當死上以其門著勲績特原之貶爲開府後襲爵燕國公尋拜澤州刺史免卒于家子世虔顓弟仲文列在隋史寔弟翼字文若美風儀有識度年十一尚文帝女平原公主拜員外散騎常侍封安平縣公大統十六年進爵郡公加大都督領文帝

帳下左右禁中宿衛謹平江陵所賜得軍實分諸子翼
一無所取唯簡實口內名望子弟有士風者別待遇之
文帝聞之特賜奴婢二百口翼固辭不受尋授車騎大
將軍開府儀同三司六官建除左宮伯孝閔踐阼出爲
渭州刺史翼兄寔先涖此州頗有惠政翼又推誠布信
事存寬簡夷夏感悅比之大小馮君時吐谷渾入寇河
右涼鄯河三州咸被攻圍使來告急秦州都督遣翼赴
援翼不從寮屬咸以爲言翼曰攻取之術非夷俗所長

此來不過抄掠邊牧耳安能頓兵城下久事攻圍掠而無獲勢將自走勞師以往必無所及翼揣之已了幸勿復言數日問至果如翼所策賀蘭祥討吐谷渾翼率州兵先鋒深入以功增邑尋徵拜右宮伯明帝雅好文史立麟趾學在朝有藝業者不限貴賤皆聽預焉乃至蕭攜王褒等與卑鄙之徒同爲學士翼言於帝曰蕭攜梁之宗子王褒梁之公卿今與趨走同儕恐非尚賢貴爵之義帝納之詔翼定其班次於是有等差矣明帝崩翼

與晉公護同受遺詔立武帝保定元年從軍司馬三年
改封恒山郡公天和初遷司會中大夫三年皇后阿史
那氏至自突厥武帝行親迎之禮命翼總司儀制狄人
雖蹲踞無節然咸憚翼之禮法莫敢違犯遭父憂去職
居喪過禮爲時輩所稱尋有詔起令視事武帝又以翼
有人倫之鑒皇太子及諸王等傅相以下並委翼選置
其所擢用皆民譽也時論僉謂得人遷大將軍總中外
宿衛兵事晉公護以帝委翼腹心內懷猜忌轉爲小司

徒加拜柱國雖外示崇重實疎斥之及護誅帝召翼遣
往河東取護子中山公訓仍代鎮蒲州翼曰冢宰無君
陵上自取誅夷元惡既除餘孽宜殄然皆陛下骨肉猶
謂疎不間親陛下不使諸王而使臣異姓非直物有橫
議愚臣亦未安帝然之乃遣越王盛代翼先是齊陳二
境各脩邊防雖通聘好而每歲交兵然一彼一此不能
有所克獲武帝既親萬機將圖東討詔邊城並益儲峙
加戍卒二國聞之亦增修守禦翼諫曰疆場相侵互有

勝敗徒損兵儲非策之上者不若解邊嚴減兵防繼好

息民敬待來者彼必喜於通和懈而無備然後出其不

意一舉而山東可圖帝納之建德二年出爲安州總管

時大旱涓水絕流舊俗每逢亢旱禱白兆山祈雨帝先

禁羣祀山廟已除翼遣主簿祭之即日澍雨歲遂有年

百姓感德聚會歌舞頌之四年武帝將東伐朝臣未有

知者遣納言盧韞前後三乘駟詣翼問策翼贊成之及

軍出詔翼率兵二萬自宛葉趨襄城旬日下齊一十九

城所過秋毫無犯所部都督輒入民村即斬以殉百姓
欣悅赴者如歸屬帝有疾班師翼亦旋鎮五年轉陝熊
等七州十六防諸軍事宜陽總管翼以宜陽地非襟帶
請移鎮於陝詔從之仍除陝州刺史總管如舊其年大
軍東討翼自陝入九曲攻拔造澗等諸城徑到洛陽齊
洛州刺史獨孤永業開門出降河南九州三十鎮一時
俱下襄城民庶等喜於見翼壺漿道左除河陽總管仍
徙豫州勅給兵馬并配開府及儀同等二十人仍勅有

武幹者任翼補牒不限多少儀同已下官爵承制先授
後聞陳將魯天念久圍光州聞翼到汝南望風退散大
象初徵拜大司徒詔翼巡長城立亭障西自鴈門東至
碣石創新改舊咸得其要害云仍除幽州總管先是突
厥屢爲抄掠居民失業翼素有威聲兼明斥候自是不
敢犯塞百姓安之及尉遲迥據相州舉兵以書招翼翼
執其使并書送之時隋文帝執政賜翼雜繒一千五百
段及粟麥甚多并珍寶服玩等進位上柱國封任國公

增邑通前五千戶別食任城縣一千戶收其租賦翼又遣子讓通表勸進并請入朝隋文帝許之開皇初翼入朝上降榻握手極歡數日拜太尉或有告翼往在幽州欲同尉遲迥按驗以無實見原三年薨於本位加贈六州諸軍事蒲州刺史諡曰穆翼性恭儉與物無競常以滿盈自戒故能以功名終子璽嗣璽字伯符少有器幹仕周位職方中大夫封黎陽縣公宣帝嗣位轉右勳曹中大夫尋領右忠義隋文帝受禪加上大將軍進爵郡

公歷汴邵二州刺史所歷並有威惠後檢校江陵總管
邵州人張願等數十人詣闕上表請留璽上嘉歎良久
令還邵州父老相賀歷洛熊二州刺史亦粗有惠政以
疾還京師卒於家諡曰靜有子志本璽弟詮位上儀同
三司吏部下大夫恒山公詮弟讓儀同三司翼弟義字
慈恭少矜嚴有操尚篤志好學魏大統末以父功賜爵
平昌縣伯後改封廣都縣公孝閔帝踐阼累遷安武太
守專崇教德不尚威刑郡人張善安王叔兒爭財相訟

義曰太守德薄之所致於是以家財分與二人喻而遣去善安等各懷愧恥移貫他州於是風教大洽進封建平郡公明武世歷西克瓜邵三州刺史數從征伐進位開府宣帝即位政刑日亂義上疏諫帝時鄭譯劉昉以恩倖當權謂義不利於己先惡之於帝帝覽表色動謂侍臣曰于義謗訕朝廷也御正大夫顏之儀進曰古先哲王立謗訕之木置敢諫之鼓猶懼不聞過于義之言不可罪也帝乃解及王謙構逆隋文帝謀將於高潁潁

言義可爲元帥文帝將任之劉昉曰梁睿位望素重不可居義下乃以睿爲元帥義爲行軍總管將左軍破謙將達奚悉於開遠尋拜漳州總管賜奴婢五百口雜綵三千段超拜上柱國時義兄翼爲太尉弟智兄子仲文並上柱國大將軍已上十餘人稱爲貴戚後以疾免卒於京師贈豫州刺史諡曰剛子宣道宣敏皆知名列在隋史義弟禮上將軍趙州刺史安平郡公禮弟智初爲開府以受宣帝密旨告齊王憲反遂封齊國公尋拜柱

國大司空智弟紹上開府綏州刺史華陽郡公紹弟弼
上儀同平恩縣公弼弟蘭上儀同襄陽縣開國公蘭弟
曠上儀同贈恒州刺史

宇文貴字永貴其先昌黎大棘人也徙居夏州父莫豆
干保定中以貴勲追贈柱國大將軍少傅夏州刺史安
平郡公貴母初孕貴夢老人抱一子授之曰賜爾是子
俾壽且貴及生形類所夢故以永貴字之貴少從師受
學嘗輟書歎曰男兒當提劍汗馬以取公侯何能爲博

士也魏正光末破六韓拔陵圍夏州刺史源子邕嬰城固守以貴爲統軍後從爾朱榮禽葛榮於滏口加別將又從元天穆平邢杲轉都督元顥入洛貴率鄉兵從爾朱榮有功封革融縣侯除郢州刺史入爲武衛將軍關內大都督從魏孝武西遷進爵化政郡公貴善騎射有將帥才文帝又以宗室故甚親委之大統初與獨孤信入洛陽東魏潁川長史賀若統據潁川來降東魏遣將堯雄趙育是云寶率衆二萬攻潁川貴自洛陽率步騎

二千救之軍次陽翟雄等去潁川四十里東魏行臺任祥又率衆四萬將與雄合諸將咸以彼衆我寡不可爭鋒貴曰若賀若一陷吾輩坐此何爲遂入潁川雄等稍進貴率千人背城爲陣與雄合戰貴馬中流矢乃短兵步鬪雄大敗輕走趙育於是降任祥聞雄敗遂不敢進貴乘勝逼祥敗之是云寶亦降師還魏文帝在天游園以金卮置侯上令公卿射中者即賜之貴一發而中帝笑曰由基之妙正當爾耳進侍中驃騎大將軍開府儀

同三司十六年遷中外府左長史進位大將軍宕昌王
梁彌定爲宗人獠甘所逐來奔又有羌酋傍乞鐵忽因
梁企定反後據有渠株川擁隸數千家與渭州人鄭五
醜同反文帝令貴與豆盧寧討之貴等禽斬鐵忽及五
醜寧又別擊獠甘破之乃納彌定并於渠株川置岷州
朝廷重功遂於粟坂立碑以紀其績廢帝三年詔貴代
尉遲迥鎮蜀時隆州人開府李光易反於鹽亭攻圍隆
州而隆州人李拓亦聚衆反開府張道應之貴乃命開

府叱奴興攻隆州又令開府成亞擊拓及道降之並送

京師除益州刺史未就拜小司徒先是蜀人多劫盜貴

乃召任俠傑健者置爲游軍二十四部令其督捕由是

頗息孝閔帝踐阼進位柱國拜御正中大夫武成初與

賀蘭祥討吐谷渾軍還進封許國公邑萬戶舊爵回封

一子遷大司空行小冢宰歷大司徒遷太保貴好音樂

耽弈碁留連不倦然好施愛士時人以此稱之保定末

使突厥迎皇后天和二年還至張掖薨贈太傅諡曰穆

子善嗣善弘厚有武藝大象末位上柱國封許國公隋文帝受禪遇之甚厚拜其子穎上儀同及善弟愷誅並廢于家善未幾卒穎大業中位司農少卿後沒李密善弟忻愷列在隋史

侯莫陳崇字尚樂代郡武川人也其先魏之別部居庫斛真水祖元以良家子鎮武川因家焉父興殿中將軍羽林監後以崇著勲追贈柱國太保清河郡公崇少驍勇善騎射謹慤少言年十五隨賀拔岳與爾朱榮征葛

榮以功除建威將軍後從岳入關討赤水蜀又從岳力戰破万俟醜奴崇與輕騎逐北至涇州長阮及之賊未成列崇單騎入賊中於馬上生擒醜奴衆悉披靡遂大破之封臨涇縣侯岳以醜奴所乘馬及寶劍金帶賞之及岳爲侯莫陳悅所害崇與諸將同謀迎文帝至原州刺史史歸猶爲悅守城文帝遣崇襲歸直到城下即據城門時李遠兄弟在城內先知崇來中外鼓譟伏兵悉起遂禽歸斬之以崇行原州事仍從平悅別封廣武縣

伯累遷車騎大將軍開府儀同三司改封彭城郡公大
統三年從禽竇泰復弘農破沙苑四年從戰河橋崇功
居多又別討平稽胡累戰皆有功進位柱國大將軍六
官建拜大司空孝閔踐阼進封梁國公邑萬戶加太保
歷太宗伯大司徒保定三年武帝幸原州夜還京師崇
竊怪其故崇謂所親人常昇曰吾比聞卜筮者言晉公
今年不利車駕今忽夜還不過是晉公死耳於是皆傳
之或有發其事者帝集諸公卿於大德殿責崇崇惶懼

謝罪其夜護遣使將兵就崇宅逼令自殺葬禮如常儀

諡曰躁護誅改諡曰莊閔子芮嗣位柱國從武帝東伐

率衆守太行道并州平授上柱國仍從平鄴拜大司馬

隋文大業初以譴詔流配嶺南芮弟頴列在隋史崇兄

順少豪俠有志度初事爾朱榮爲統軍普泰元年封本

縣子後從魏孝武入關順與文帝同里閭素相友善且

崇先在關中文帝見之甚歡進爵彭城郡公及梁企定

圍逼河州以順爲大都督與趙貴討破之即行河州事

大統四年魏文帝東討順與太尉王盟僕射周惠達等

留鎮長安時趙青雀反盟及惠達奉魏太子出次渭北

順於渭橋與賊戰頻破之魏文帝還執順手曰渭橋之

戰卿有殊力便解所服金鏤玉梁帶賜之南岐州氏苻

安壽遂率部落一千家款附時順弟崇又封彭城郡公

遂改封順河間郡公六年加驃騎大將軍開府儀同三

司行夏州事改封平原郡公孝閔帝踐阼拜少師進位

柱國其年薨崇弟瓊歷位荊州總管上柱國封脩武郡

公瓊弟凱以軍功賜爵下蔡縣男崇以平原州功賜爵
靈武縣侯詔聽轉授凱孝閔踐阼進位開府儀同三司
進爵爲公天和中爲司會中大夫建德二年爲聘齊使
主

王雄字雄胡布頭太原人也父崙以雄著勲追贈柱國
大將軍少傅安康郡公雄儀貌魁梧少有謀畧魏末從
賀拔岳入關除金紫光祿大夫孝武西遷封臨晉縣伯
大統中進爵武威郡公累遷大將軍行同州事魏恭帝

元年賜姓可頻氏孝閔帝踐阼授少傅進位柱國大將軍武成初進封庸國公邑萬戶出爲涇州總管保定四年從晉公護東征至芒山與齊將斛律明月戰退走左右皆散矢又盡唯餘一奴一矢在焉雄案稍不及明月者文餘曰惜爾不得殺但生將爾見天子明月反射雄中額抱馬走至營薨贈使持節太保同華等二十州諸軍事同州刺史諡曰忠子謙字敕萬性恭謹無他才能以父功封安樂縣伯保定二年父雄封庸國公以武威

郡公回封謙安樂伯回封第三弟震雄死朝議以謙父

殞於行陣特加殊寵授柱國大將軍襲爵庸國公建德

五年武帝東征謙力戰進位上柱國六年授益州總管

十八州諸軍事及宣帝崩隋文帝輔政以梁睿爲益州

總管時謙使司錄賀若昂奉表詣闕昂還具陳京師事

謙以父子受國恩將圖匡復遂舉兵署置官司總管長

史乙弗虔益州刺史達奚基勸謙憑險觀變隆州刺史

高阿那肱爲謙畫三策曰公親率精銳直指散關蜀人

知有勤王之節必當各思効命此上策也出兵梁漢以顧望天下此中策也坐守劔南發兵自衛此下策也謙參用其中下之策梁睿未至大劔謙先遣兵鎮始州隋文帝即以睿爲行軍元帥便發利鳳文秦成諸州兵討之謙所署柱國達奚悉高阿那肱大將軍乙弗虔楊安任峻侯翕景孱等衆號十萬盡銳攻利州總管楚國公豆盧勣拒戰將四旬悉等諸軍聞睿將至衆遂潰謙所署大將軍苻子英攻巴州又爲刺史呂珍所破睿承其

弊縱兵深入基虔密遣使詣睿請爲內應以贖罪謙不知基虔之反已也並令守成都謙先無籌畧且所任用多非其才及聞睿兵奄至惶懼計無所出乃自率衆逆戰又以基虔之子爲左右軍行數十里左右軍皆叛謙奔新都縣令王寶執而斬之傳首京師基虔以成都降隋文帝以基虔首謀令殺之於蜀市餘衆並散阿那肱尋亦被誅

初魏孝莊帝以爾朱榮有翊戴之功拜榮爲柱國大將

軍位在丞相上榮敗後此官遂廢大統三年魏文帝復以文帝建中興之業始命爲之其後功參佐命望實俱重者亦居此職自大統十六年以前居是任者凡有八人文帝位總百揆都督中外軍事魏廣陵王欣元氏懿戚從容禁闥而已此外六人各督二大將軍分掌禁旅當爪牙禦侮之寄當時榮盛莫與爲比故一時稱門閥者咸推八柱國家云今并十二大將軍錄之於左

使持節太尉柱國大將軍大都督尚書左僕射隴右

行臺少師隴西郡開國公李虎

使持節太傅柱國大將軍大宗師大司徒廣陵王元
欣

使持節太保柱國大將軍大都督大宗伯趙郡開國
公李弼

使持節柱國大將軍大都督大司馬河內郡開國公
獨孤信

使持節柱國大將軍大都督大司寇南陽郡開國公

趙貴

使持節柱國大將軍大都督大司空恒山郡開國公
于謹

使持節柱國大將軍大都督少傅彭城郡開國公侯
莫陳崇

右與文帝爲八柱國

後並改封此
並文帝時爵

使持節大將軍大都督少保廣平王元贊

使持節大將軍大都督淮安王元育

使持節大將軍大都督齊王元廓

使持節大將軍大都督平原郡開國公侯莫陳順

使持節大將軍大都督七州諸軍事秦州刺史章武
郡開國公宇文遵

使持節大將軍大都督雍州刺史高陽郡開國公達

奚武

使持節大將軍大都督陽平郡開國公李遠

使持節大將軍大都督范陽郡開國公豆盧寧

使持節大將軍大都督化政郡開國公宇文貴

使持節大將軍大都督荊州刺史博陵郡開國公賀

蘭祥

使持節大將軍大都督陳留郡開國公楊忠

使持節大將軍大都督岐州諸軍事岐州刺史武威
郡開國公王雄

右十二大將軍每大將軍督二開府凡爲二十

四員分團統領是爲二十四軍每一團儀同二

人自相統率不編戶貫都十二大將軍十五日

上則門闌陞戟警晝巡夜十五日下則教旗習

戰無他賦役每兵惟辦弓刀一具月簡閱之甲

槩戈弩並資官給自大統十六年以前十二大

將軍外念賢及王思政亦拜大將軍然賢作牧

隴右思政出鎮河南並不在領兵之限此後功

臣位至柱國及大將軍者衆矣不限此秩無所

統御八柱國十二大將軍之後有以位次嗣掌

其事者而德望素在諸公之下並不得預於此

例

王盟字忤明德皇后之兄也其先樂浪人六世祖波前
燕太宰祖珍魏黃門侍郎贈并州刺史樂浪公父罷伏
波將軍以良家子鎮武川因家焉魏正光中破六韓拔
陵攻陷諸鎮盟亦爲其所擁拔陵平後流寓中山復以
積射將軍從蕭寶夤西征寶夤僭逆盟遂逃匿民間及
爾朱天光入關盟從之隨賀拔岳禽万俟醜奴平秦隴

常先登力戰及文帝平侯莫陳悅除盟原州刺史孝武至長安封魏昌縣公大統三年徵拜司空轉司徒迎文帝悼后於蠕蠕加侍中遷太尉魏文帝東征以留後大都督行雍州節度關中諸軍趙青雀爲亂盟與開府李虎輔太子出頓渭北事平進爵蔡郡公賜姓拓王氏遷太保九年進位太傅加開府儀同三司盟姿度弘雅仁而汎愛雖居師傅禮冠羣后而謙恭自處未嘗以勢位驕人魏文帝甚尊重之及疾數幸其第親問所欲十一

年薨贈本官諡曰孝定子勛字醜興性忠果有才幹年
十七從文帝入關及平秦隴定關中文帝嘗謂曰爲將
坐見成效者上也被堅執銳者次也勛曰意欲兼備之
文帝大笑尋拜散騎常侍賜爵梁甫縣公大統初爲千
牛備身直長領左右出入卧内小心謹厚魏文帝嘗曰
王勛可謂不二心臣也沙苑之役勛以都督領禁兵居
左翼當其前者死傷甚衆勛亦被傷重遂卒於行間文
帝深悼焉贈使持節太尉尚書令十州諸軍事雍州刺

史追封咸陽郡公諡曰忠武子弼襲爵尚魏安樂公主位大都督通直散騎常侍勣弟懋字小興盟之西征也以懋留在山東永安中始入關與盟相見遂從征伐大統初賜爵安平縣子後進爵爲公累遷右衛將軍于時疆場交兵未申喪紀服齊斬者並墨纓從事及盟薨懋上表辭位乞終喪制魏文帝不許累遷開府儀同三司侍中左衛將軍領軍將軍懋溫和小心敬慎宿衛宮禁十有餘年勤恪當官未嘗有過廢帝二年除南岐州刺

史賜爵安寧郡公後拜小司寇卒於官子悅嗣位大將軍同州刺史改封濟南郡公盟兄子顯幼而敏悟沈靜少言初爲文帝帳內都督累遷驃騎大將軍開府儀同三司光祿卿鳳州刺史賜爵洛陽縣公進位大將軍子誼列在隋史

獨孤信雲中人也本名如願魏氏之初有四十六部其先伏留屯者爲部落大人與魏俱起祖俟尼和平中以良家子自雲中鎮武川因家焉父庫者爲領人酋長少

雄豪有節義北州咸敬服之信美容儀善騎射以北邊
喪亂避地中山正光末與賀拔度等同斬衛可瓌由是
知名後爲葛榮所獲信既少年好自修飾服章有殊於
衆軍中號爲獨孤郎及爾朱氏破葛榮以信爲別將從
征韓樓信匹馬挑戰禽賊漁陽王袁肆周後以破元顥
黨賜爵受德縣侯遷武衛將軍賀拔勝出鎮荊州乃表
信爲大都督及勝弟岳爲侯莫陳悅所害勝乃令信入
關撫岳餘衆屬文帝已統岳兵信與文帝鄉里少相友

善相見甚歡因令信入洛請事至雍州大使元毗又遣
信還荊州尋徵入朝魏孝武雅相委任及孝武西遷事
起倉卒信單騎及之於瀍澗孝武歎曰武衛遂能辭父
母捐妻子遠來從我世亂識忠良豈虛言哉即賜御馬
一匹進爵浮陽郡公時荊州雖陷東魏民心猶戀本朝
乃以信爲衛大將軍都督三荊州諸軍事兼尚書右僕
射東南道大行臺大都督荊州刺史以招懷之既至東
魏刺史辛纂出戰信縱兵擊纂大敗之都督楊忠等前

驅斬纂又破諸蠻於是三荆遂定就拜車騎大將軍東
魏遣其將高敖曹侯景等率衆奄至信以衆寡不敵遂
率麾下奔梁居三載梁武帝方許還北信父母既在山
東梁武問信所徃信答以事君無二梁武深義之禮送
甚厚大統三年秋至長安自以虧損國威上書謝罪魏
文帝付尚書議之七兵尚書陳郡王元等議以爲既經
恩降請赦罪復職詔轉驃騎大將軍加侍中開府尋拜
領軍將軍仍從文帝復弘農破沙苑改封河內郡公俘

虜中有信親屬始得父凶問乃發喪行服尋起爲大都督與馮翊王元季海入洛陽潁豫襄廣陳留之地並相繼款附四年東魏將侯景等圍洛陽信據金墉城隨方拒守旬有餘日及文帝至瀍東景退走信與李遠爲右軍戰不利東魏遂有洛陽六年侯景寇荊州文帝令信與李弼出武關景退即以信爲大使慰撫二荆尋除隴右十一州大都督秦州刺史先是守宰闇弱政令乖方人有冤訟歷年不能決及信在州事無擁滯示以禮教

勸以耕桑數年之中公私富實流人願附者數萬家文帝以其信著遐邇故賜名爲信七年岷州刺史赤水蕃王梁企定舉兵反詔信討之企定尋爲其部下所殺而企定子弟仍收其餘衆信乃勒兵向萬年頓三交谷口賊併力拒守信因詭道趣稠松嶺賊不虞信兵之至望風奔潰乘勝追北徑至城下賊並出降加授太子太保芒山之戰大軍不利信與于謹帥散卒自後擊之齊神武追騎驚擾諸軍因此得全及涼州刺史宇文仲和據

州不受代文帝令信率開府怡峯討之仲和嬰城固守

信夜令諸將以衝梯攻其東北信親率壯士襲其西南
遲明克之禽仲和虜其六千戶送于長安拜大司馬十
三年大軍南討時以蠕蠕爲寇令信移鎮河陽十四年
進位柱國大將軍錄前後功增封聽回授諸子於是第
二子善封魏寧縣公第三子穆必要縣侯第四子藏義
寧縣侯邑各一千戶第五子順武城縣侯第六子陁建
忠縣伯邑各五百戶信在隴右歲久啓求還朝文帝不

許或有自東魏來者又告其母凶問乃發喪行服信陳
哀苦請終禮制又不許於是追贈信父庫者司空公追
封信母費連氏恒山郡君十六年遷尚書令六官建拜
大司馬孝閔帝踐阼遷太宗伯進封衛國公邑萬戶趙
貴誅後信以同謀坐免居無幾晉公護又欲殺之以其
名望素重不欲顯其罪過逼令自盡於家時年五十五
信美風度雅有奇謀大畧文帝初啓霸業唯有關中之
地以隴右形勝故委信鎮之既爲百姓所懷聲震隣國

東魏將侯景之南奔梁也魏收爲檄梁文矯稱信據隴
右不從宇文氏乃云無闕西之憂欲以委梁人也又信
在秦州嘗因獵日暮馳馬入城其帽微側詰旦而吏民
有戴帽者咸慕信而側帽焉其爲隣境及士庶所重如
此子羅先在東魏乃以次子善爲嗣及齊平羅至而善
卒又以羅主嗣信長女周明帝敬后其季女隋文帝獻
后獨孤氏自周隋及唐三代皆爲外戚自古以來未之
有也隋文帝踐極乃下詔褒贈太師上柱國十州諸軍

事冀州刺史封趙國公邑一萬戶諡曰景追贈信父庫
者使持節太尉上柱國六州諸軍事定州刺史封越國
公邑一萬戶諡曰恭信母費連氏贈太尉趙恭公夫人
羅善等俱列在隋外戚傳

竇熾字光成扶風平陵人漢大鴻臚章十一世孫也章
子統靈帝時爲鴈門太守避竇武之難亡奔匈奴遂爲
部落大人後魏南徙子孫因家於代賜姓紇豆陵氏累
世仕魏皆至大官父畧平遠將軍以熾著勲贈少保柱

國大將軍建昌公熾性嚴明有謀畧美鬚髯身長八尺
二寸少從范陽祁忻授毛詩左氏春秋畧通大義善騎
射膂力過人魏正光末北鎮擾亂熾隨父畧避地定州
沒於葛榮榮欲官畧畧不受榮疑其有異志遂留畧於
冀州將熾及熾兄善隨軍及爾朱榮破葛榮熾乃將家
隨榮於并州時葛榮別將韓樓等數萬人據薊城不下
以熾爲都督從驃騎將軍侯深討之熾手斬樓以功拜
揚烈將軍魏孝武即位蠕蠕等諸蕃並遣使朝貢帝臨

軒宴之有鵠飛鳴於殿前帝素知熾善射因欲矜遠人
乃給熾御箭兩隻命射之鵠乃應弦而落諸蕃人咸歎
異之帝大悅賜帛五十疋尋隨東南道行臺樊子鵠追
爾朱仲遠奔梁時梁主又遣元樹入寇據譙城子鵠令
熾擊破之封行唐縣子尋進爵上洛縣伯時帝與齊神
武構隙以熾有威重堪處爪牙之任拜閣內大都督遷
朱衣直閣遂從帝西遷仍與其兄善重至城下與武衛
將軍高金龍戰於千秋門敗之因入宮城取御馬四十

匹并鞍勒進之行所帝大悅賜熾及善駿馬各二匹駕馬十匹大統元年以從駕功除東豫州刺史別封真定縣公從文帝禽竇泰復弘農破沙苑皆有功河橋之戰諸將退走熾時獨從兩騎爲敵人所追至邙山熾乃下馬背邙山抗之俄而敵衆漸多三面攻圍矢下如雨熾騎士所執弓並爲敵人所射破熾乃總收其箭以射之所中人馬皆應弦而倒敵乃相謂曰得此三人未足爲功乃稍引退熾因其怠遂突圍得出又從太保李弼討

白額稽胡破之高仲密以北豫州來赴熾從文帝援之
至洛陽會東魏人據邙山爲陣文帝命留韜重於瀍曲
率輕騎奮擊中軍與右軍大破之悉虜其步卒熾獨追
至石濟而還大統十三年進使持節驃騎大將軍開府
儀同三司加侍中出爲涇州刺史涇職數年政號清靜
改封武安縣公魏廢帝元年除大都督原州刺史熾抑
挫豪右申理幽滯每親巡龍畝勸人耕桑在州十載甚
有政績州城之北屬有泉水熾屢經遊踐嘗與僚吏宴

於泉側因酌水飲曰吾在此州唯當飲水而已及去職
之後吏民感其遺惠每至此泉者莫不懷之魏恭帝元
年進爵廣武郡公屬蠕蠕寇廣武熾與柱國趙貴分路
討之蠕蠕引退熾度河追討至麴伏川追及大破之斬
其酋帥郁久間是發獲生口數千孝閔踐阼拜柱國大
將軍明帝時以熾前朝舊臣勲望兼重欲獨爲造第熾
辭以天下未平干戈未偃不宜趣發徒役明帝不許尋
而帝崩事方得寢保定元年進封鄧國公邑一萬戶別

食資陽縣一千戶收其租賦四年授大宗伯天和五年
出爲宜州刺史先是文帝田於渭北令熾與晉公護分
射走兔熾一日獲十七頭護獲十一頭恥其不及因以
爲嫌至是熾又以武帝年長勸護歸政護惡之故左遷
焉及護誅徵拜太傅熾既朝之元老名望素隆至於軍
國大謀常與參議嘗有疾武帝幸其第而問之因賜金
石之樂其見禮如此帝於大德殿將謀伐齊熾時年已
衰老乃扼腕曰臣雖朽邁請躬執干櫓首啓戎行得一

觀誅翦鯨鯢廓清宇宙省方觀俗登嶽告成然後歸魂
泉壤無復餘恨帝壯其志節遂以熾第二子武當公恭
爲左二軍總管齊平之後帝乃召熾歷觀相州宮殿熾
拜賀曰陛下真不負先帝矣帝大悅進位上柱國宣政
元年兼雍州牧及宣帝營建東京以熾爲洛京營作大
監宮苑制度皆取決焉大象初改食樂陵縣邑戶如舊
隋文帝入輔政停洛陽宮作熾請入朝屬尉遲迴舉兵
熾乃移入金墉與洛州刺史平涼公元亨同心固守仍

權行洛陽鎮事相州平熾方入朝隋文帝初爲相國百官勸進熾自以累代受恩遂不肯署牋時人高其節及隋文踐極拜太傅加殊禮贊拜不名開皇四年八月薨時年七十八贈八州諸軍事冀州刺史諡曰恭熾事親以孝聞奉諸兄以悌聞及其位望隆重而子孫皆處列位遂爲當時盛族子茂嗣茂有弟十三人恭威最知名恭位至大將軍從武帝平齊封贊國公除西兗州總管以罪賜死熾兄善以中軍大都督南城公從魏孝武西

遷仕至太僕衛尉卿汾北華瀛三州刺史驃騎大將軍

開府儀同三司永富縣公諡曰忠子榮定嗣榮定列在

隋史熾兄子毅字天武父岳早卒及毅著勲追贈大將

軍冀州刺史毅深沉有器度事親以孝聞魏孝武初起

家員外散騎侍郎時齊神武擅朝毅慨然有徇主之志

從孝武西遷封奉高縣子從禽竇泰復弘農戰沙苑皆

有功進爵安武縣公恭帝元帝進授驃騎大將軍開府

儀同三司大都督改封永安縣公出爲幽州刺史孝閔

帝踐阼進爵神武郡公保定三年拜大將軍時與齊人
爭衡戎車歲動並交結突厥以爲外援突厥已許納女
於周齊人亦甘言重幣遣使求昏狄人便欲有悔朝廷
乃令楊荐等累使結之往返十餘方復前好至是雖期
往逆猶懼改圖以毅地兼勲戚素有威重乃令爲使及
毅至齊使亦在焉突厥君臣猶有異志毅抗言正色以
大義責之累旬乃定卒以皇后歸朝廷嘉之別封成都
縣公進位柱國歷同州刺史蒲金二州總管加上柱國

入爲大司馬隋開皇初拜定州總管累居藩鎮咸得人
和二年薨於州贈襄郢等六州刺史諡曰肅毅性溫和
每以謹慎自守又尚文帝第五女襄陽公主特爲朝廷
所委信雖任兼外內未嘗有矜情之容時人以此稱焉
子賢嗣賢字託賢志業通敏少知名宣政元年授使持
節儀同大將軍開皇中襲爵神武郡公除遷州刺史毅
第二女即唐太穆皇后武德元年詔贈毅司空使持節
總管荆郢等十州諸軍事荊州刺史杞國公又追贈賢

子紹宣秦州刺史并襲賢爵紹宣無子仍以紹宣兄子
德藏嗣

賀蘭祥字盛樂其先與魏俱起有乞伏者爲賀蘭莫何
弗因以爲氏後有以良家子鎮武川者遂家焉父初真
少知名爲鄉里所重尚文帝姊建安長公主保定二年
追贈太傅柱國恒山郡公祥年十一而孤居喪合禮長
於舅氏時爲文帝所愛雖在戎旅常博延儒生教以書
傳文帝初入關祥與晉公護俱在晉陽後乃遣使迎致

之解褐奉朝請祥少有膽氣志在立功尋擢都督常居
帳下從平侯莫陳悅又迎魏孝武以前後功封撫夷縣
伯仍從擊潼關獲東魏將薛長儒又攻回洛拔之還拜
左右直長進爵爲公大統九年從文帝與東魏戰於芒
山進位驃騎大將軍開府儀同三司加侍中十四年除
都督荊州刺史進爵博陵郡公先是祥嘗行荊州事雖
未朞月頗有惠政至是重往百姓安之由是漢南流人
襁負至者日有千數遠近蠻夷莫不款附隨機撫納咸

得其歡心時盛夏亢陽祥親巡境內觀政得失見有發掘古墓暴露骸骨乃謂守令曰此豈仁者爲政邪命所在收葬之即日澍雨是歲大有年境內多古墓其俗好行發掘至是遂息祥雖文帝密親性甚清素州境南接襄陽西通岷蜀物產所出多諸珍異既與梁通好行李往來公私贈遺一無所受梁雍州刺史岳陽王蕭詧欽其風素乃以竹屏風絺綌之屬及經史贈之祥難違其意取而付諸所司文帝後聞之並以賜祥十六年拜大

將軍文帝以涇渭溉灌之處渠堰廢毀乃令祥修造富平堰開渠引水東注於洛功用既畢人獲其利魏廢帝二年行華州事後改華州爲同州仍以祥爲刺史尋拜尚書左僕射六官建授小司馬孝閔帝踐阼進位柱國大司馬時晉公護執政祥與護中表少相親愛軍國之事護皆與祥參謀及誅趙貴廢閔帝祥有力焉武成初吐谷渾侵掠州郡詔祥與宇文貴總兵討之祥乃遣其軍司檄吐谷渾與吐谷渾廣定王鍾留王等戰破之因

拔其洮陽洪和二城以其地爲洮州撫安西土振旅而
還進封涼國公薨贈太師同岐等十二州諸軍事同州
刺史諡曰景有七子敬讓璨師寬知名敬少歷顯職封
仇隆縣侯後襲涼國公位柱國華州刺史讓大將軍鄭
州刺史河東郡公璨開府儀同三司宣陽郡公建德五
年從平并州遷幽州刺史博陵郡公寬開府儀同大將
軍戰歿贈上儀同大將軍追封清都公師尚明帝女位
上儀同大將軍武始公入隋歷汴鄭二州刺史並著政

績祥弟隆大將軍襄樂縣公隋文帝與祥有舊開皇初
追贈上柱國

叱列伏龜字摩頭陀代郡西部人也其先爲部落大人
魏初入附遂世爲第一領人酋長至龜五世龜容貌瓌
偉腰帶十圍進止詳雅兼有武藝嗣父業復爲領人酋
長魏孝昌三年以別將從長孫承業西征累遷金紫光
祿大夫從還洛授都督遂爲齊神武所寵任加大都督
沙苑之敗隨例來降文帝以其豪門解縛禮之仍以邵

惠公女妻之大統四年封長樂縣公自此常從征討亟有戰功歷侍中驃騎大將軍開府儀同三司恒州刺史卒子椿嗣椿字千年明帝時位驃騎大將軍開府儀同三司改封永世縣公天和初除左宮伯進位大將軍

閻慶字仁度河陰人也曾祖善仕魏歷龍驤將軍雲州鎮將因家雲州之盛樂郡祖提使持節車騎大將軍敦煌鎮都大將父進有謀畧勇冠當世正光中拜龍驤將軍屬衛可瓌作亂攻圍盛樂進率衆拒守以功拜盛樂

郡守慶幼聰敏重然諾風儀端肅望之儼然隨父固守
盛樂頗有力焉拜別將後以軍功拜步兵校尉中堅將
軍既而齊神武舉兵入洛魏孝武西遷慶謂所親曰高
歡跋扈將有篡逆之謀豈可苟安目前受其控制也遂
以大統三年自宜陽歸闕即拜奉車都尉稍遷後將軍
封安次縣子以功進爵爲伯慶善於綏撫士卒未休未
嘗先舍故能盡其死力屢展勲勞累遷散騎常侍驃騎
大將軍開府儀同三司雲州大中正加侍中賜姓大野

氏孝閔帝踐阼出爲河州刺史進爵石保縣公州居河
外地接戎夷慶留心撫納頗稱簡惠就拜大將軍進爵
太安郡公入爲小司空歷雲寧二州刺史慶性寬和不
苛察百姓悅之天和五年進位柱國晉公護母慶之姑
也護雖擅朝而慶未嘗阿附及護誅武帝以此重之乃
詔慶第十二子毗尚帝女清都公主慶雖望位隆重婚
連帝室常以謙慎自守時人以此稱之建德二年抗表
致事優詔許焉慶既衰老恒嬰沈痼宣帝以其先朝耆

舊特異常倫乃詔靜帝至第問疾賜布千段醫藥所須
令有司供給大象二年拜上柱國隋文帝踐極又令皇
太子就第問疾仍供醫藥之費開皇二年薨年七十七
贈司空七州諸軍事荊州刺史諡曰成長子常先慶卒
次子毗嗣毗隋史有傳

史寧字永在建康表氏人也曾祖豫仕沮渠氏爲臨松
令魏平涼州祖灌隨例遷於撫寧鎮因家焉父遵初爲
征虜府鎧曹參軍杜洛周構逆六鎮自相屠陷遵遂率

鄉里奔恒州其後恒州爲賊所敗遵後歸洛陽拜樓煩
郡守及寧著勲贈散騎常侍征西大將軍涼州刺史諡
曰貞寧少以軍功累加持節征東將軍金紫光祿大夫
賀拔勝爲荊州刺史寧以本官爲勝軍司隨勝之部會
荊州蠻騷動三鵠路絕寧先驅平之因撫慰蠻左翕然
降附尋除南郢州刺史及勝爲大行臺表寧爲大都督
攻梁下澧戍破之封武平縣伯及攻拔齊梁興鎮等九
城未及論功屬孝武西遷東魏遣侯景寇荊州寧隨勝

奔梁梁武帝引寧至香蹬前謂之曰觀卿風表終是富

貴我當使卿衣錦還鄉寧答曰臣世荷魏恩位爲列將

天長喪亂本朝傾覆不能北面事逆賊幸得息肩有道

儻如明詔欣幸實多因涕泣橫流梁武爲之動容在梁

二年勝乃與寧密圖歸計寧曰朱异既爲梁主所信任

請往見之勝然其言寧乃見异申以投分之言微託思

歸之意辭氣雅至异亦嗟挹爲奏梁主果許勝等歸大

統二年自梁歸進爵爲侯久之遷車騎將軍行涇州事

時賊帥莫折後熾寇掠居人寧率州兵與行原州事李
賢討破之轉東義州刺史東魏亦以胡梨苟爲東義州
刺史寧僅得入州梨苟亦至寧逆擊破之斬其洛安郡
守馮善道州既隣接彊敵百姓流移寧留心撫慰咸來
復業轉涼州刺史寧未至而前刺史宇文仲和據州作
亂詔獨孤信與寧討之寧先至涼州爲陳禍福城中吏
民皆相率降附仲和仍據城不下尋亦克之後遷驃騎
大將軍開府儀同三司加侍中進爵爲公十六年宕昌

叛羌獠甘作亂逐其王彌定而自立并連結傍乞鐵忽
及鄭五醜等詔寧率軍與宇文貴豆盧寧討之寧別擊
獠甘而山路險阻纔通單騎獠甘已分其黨立柵守險
寧進兵攻之遂破其柵獠甘將百騎走投生羌鞏廉玉
彌定遂得復位寧以未獲獠甘遂進軍大破之生獲獠
甘徇而斬之并執廉玉送闕所得軍實悉分賞將士寧
無私焉師還召寧率所部鎮河陽寧先在涼州戎夷服
其威惠遷鎮之後邊人並思慕之魏廢帝元年復除涼

甘瓜三州諸軍事涼州刺史初蠕蠕與魏和親後更離
叛尋爲突厥所破殺其主阿那瓌部落逃逸者仍奉瓌
之子孫鈔掠河右寧率兵要擊獲瓌子孫二人并其種
落酋長自是每戰破之前後降數萬人進爵安政郡公
二年吐谷渾通使於齊寧擊獲之就拜大將軍寧後遣
使詣文帝請事文帝即以所服冠履衣被及弓箭甲稍
等賜寧謂其使人曰爲我謝涼州孤解衣以衣公推心
以委公公其善始令終無損功名也時突厥木汗可汗

假道涼州將襲吐谷渾文帝命寧率騎隨之軍至番禾吐谷渾已覺奔於南山木汗將分兵追之令俱會於青海寧謂木汗曰樹敦賀真二城是吐谷渾巢穴若拔其本根餘種自然離散木汗從之乃分爲二軍木汗從北道向賀真寧趣樹敦吐谷渾娑周王率衆逆戰寧擊斬之踰山履險遂至樹敦樹敦吐谷渾舊都多諸珍藏而吐谷渾主已先奔賀真留其征南王及數千人固守樹敦寧進兵攻之僞退吐谷渾人果開門逐之因回兵奮

擊門未及闔寧兵遂得入生獲其征南王俘虜男女財
寶悉歸突厥吐谷渾賀羅拔王依險爲柵欲塞寧路寧
攻破之而木汗亦克賀真虜吐谷渾主妻子大獲珍物
寧還軍青海與木汗會木汗握寧手嘆其勇決遺所乘
馬令寧於帳前乘之木汗親自步送突厥以寧所圖必
破皆畏憚之咸曰此中國神智人也及將班師木汗又
遺寧奴婢百口馬五百匹羊一萬口寧乃還州尋被徵
入朝屬文帝崩寧悲慟不已乃請赴陵所盡哀并告行

師克捷孝閔踐阼拜小司徒出爲荊州刺史荆襄浙郢

等五十二州及江陵鎮防諸軍事寧有謀畧識兵權臨

敵指揮皆如其策甚得當時之譽及在荊州頗自奢縱

貪濁不修法度嘗出有人訴州佐屈法寧還付被訟者

治之自是有事者不敢復言聲名大損於西州保定三

年卒於州諡曰烈子雄嗣雄字世武少勇敢膂力過人

便弓馬有算畧年十四從寧於牽屯山奉迎文帝仍從

校獵弓無虛發文帝歎異之尋尚文帝女永富公主除

使持節驃騎大將軍開府儀同三司累遷駕部中大夫
司馭中大夫從柱國枹罕公辛威鎮金城遂卒於軍時
年二十四雄弟祥列在隋史

權景宣字暉遠天水顯親人也父曇騰魏隴西郡守贈
秦州刺史景宣少聰悟有氣俠宗黨皆歎異之年十七
魏行臺蕭寶夤見而奇之表爲輕騎將軍及寶夤敗景
宣歸鄉里文帝平隴右擢爲行臺郎中孝武西遷授鎮
遠將軍步兵校尉加平西將軍秦州大中正大統初轉

祠部郎中景宣曉兵權有智畧從文帝拔弘農破沙苑
皆先登陷陣轉外兵郎中從開府于謹援洛陽景宣督
課糧儲軍以周濟時初復洛陽將修繕宮室景宣率徒
三千先出採運會東魏兵至司州牧元季海等以衆少
拔還屬城悉叛道路壅塞景宣將二十騎且戰且走從
騎畧盡景宣輕馬突圍手斬數級馳而獲免因投人家
自匿景宣以久藏非計乃僞作文帝書招募得五百餘
人保據宜陽聲言大軍續至東魏將段琛等率衆至九

曲憚景宣不敢進景宣恐琛審其虛實乃將腹心自隨
詐云迎軍因得西遁與儀同李延孫相會攻拔孔城洛
陽以南尋亦來附文帝即留景宣守張白塢節度東南
義軍東魏將王元軌入洛景宣與延孫等擊走之以功
授行臺左丞進屯宜陽攻襄城拔之獲郡守王洪顯文
帝嘉之徵入朝錄前後功封顯親縣男除南陽郡守郡
隣敵境舊制發人守防三十五處多廢農桑而姦宄猶
作景宣至並除之唯修起城樓多備器械寇盜斂迹人

得隸業焉百姓稱之立碑頌德文帝特賞粟帛以旌其
能遷廣州刺史侯景舉河南來附景宣從僕射王思政
經畧應接既而侯景南叛恐東魏復有其地以景宣爲
大都督豫州刺史鎮樂口東魏亦遣張伯德爲刺史伯
德令其將劉貴平率其戍卒及山蠻屢來攻逼景宣兵
不滿千人隨機奮擊貴平乃退走進授使持節車騎大
將軍儀同三司潁川陷後文帝以樂口等諸城道路阻
絕悉令拔還襄州刺史杞秀以狼狽獲罪景宣號令嚴

明戎旅整肅所部全濟獨被優賞仍留鎮荊州委以鷄
南之事初梁岳陽王蕭詧將以襄陽歸朝仍勒兵攻梁
元帝於江陵詧叛將杜岸乘虛襲之景宣乃率騎三千
助詧因是乃送其妻王氏及子蔡入質景宣又與開府
楊忠取梁將柳仲禮拔安陸隨郡久之隨州城人吳士
英殺刺史黃道生因聚爲寇景宣以英小賊可以計取
若聲其罪恐同惡者衆與士英書僞稱道生凶暴歸功
士英士英等信之遂相率而至景宣執而戮之獲其黨

與進攻應城拔之獲夏侯珍於是應禮安隨並平朝議
以景宣威行南服乃授并安肆郢新應六州諸軍事并
州刺史尋進驃騎大將軍開府儀同三司加侍中兼督
江北司二州諸軍事進爵爲伯唐州蠻田魯嘉自號豫
州伯引致齊兵大爲民害景宣又破之獲魯嘉以其地
爲郡轉安州刺史梁定州刺史李洪遠初款後叛景宣
惡其懷貳密襲破之虜其家口及部衆洪遠脫身走免
自是酋帥懾服無敢叛者燕公于謹征江陵景宣別破

梁司空陸法和司馬羊亮於涓水又遣別將攻拔魯山
多造舟艦益張旗幟臨江欲度以懼梁人梁將王琳在
湘州景宣遺書喻以禍福琳遂遣長史席壑因景宣請
舉州款附孝閔帝踐阼徵爲司憲中大夫尋除基都硤
平四州五防諸軍事江陵防主加大將軍保定四年晉
公護東討景宣別畧河南齊豫州刺史王士良永州刺
史蕭世怡並以城降景宣以開府謝徹守永州開府郭
彥守豫州以士良世怡及降卒一千歸諸京師尋而洛

陽不守乃棄二州拔其將士而還至昌州而羅陽蠻反
景宣回軍破之還次霸上晉公護親迎勞之天和初授
荊州刺史總管十七州諸軍事進爵千金郡公陳湘州
刺史華皎舉州款附表請援兵勅景宣統水軍與皎俱
下景宣到夏口陳人已至而景宣以任遇隆重遂驕傲
縱恣多自矜伐兼納賄賂指麾節度朝出夕改將士憤
怒莫肯用命及水軍始交一時奔北船艦器仗畧無孑
遺時衛公直總督諸軍以景宣負敗欲繩以軍法朝廷

不忍加罪遣使就軍赦之尋遇疾卒贈河渭鄆三州刺史諡曰恭子如璋嗣位至開府膠州刺史如璋弟仕玠儀同大將軍廣川縣侯

王羆字熊羆京兆霸城人漢河南尹遵之後也世爲州郡著姓羆剛直木彊處物平當州閭重之魏天和中除殿中將軍稍遷雍州別駕清廉疾惡勵精公事刺史崔亮有知人之鑒見羆雅相欽挹亮後轉定州啓羆爲長史執政者恐羆不稱不許及梁人寇硤石亮爲都督南

討復啓罷爲長史帶銳軍朝廷以亮頻舉罷故當可用
及克硤石罷功居多先是南岐東益氏羌反叛王師戰
不利乃拜罷冠軍將軍領羽林五千鎮梁州討平諸賊
授西河內史辭不拜時人謂曰西河大邦俸祿優厚何
爲致辭罷曰京洛材木盡出西河朝貴營第宅者皆有
求假如其私辦則力所不堪若科發民間又犯違憲法
以此致辭爾梁將曹景宗圍荊州勅罷與別將裴衍率
兵赴救遂與梁人戰大破之時諸方鼎沸所在凋殘荆

州新經寇難尤藉慰撫以罷爲荊州刺史進號撫軍將軍封定陽子梁復遣曹義宗帥衆數萬圍荊州堰水灌城不沒者數版時既內外多虞未遑救援乃遺罷鐵券云城全當授本州刺史城中糧盡罷乃煮粥與將士均分而食之每出戰常不擐甲胄大呼告天曰荊州城孝文皇帝所置天若不祐國家使賊箭中王罷額不爾王罷須破賊屢經戰陣亦不被傷彌歷三年義宗方退進封霸城縣公元顥入洛以罷爲左軍大都督顥敗莊帝

以罷授顯官故不得本州更除岐州刺史時南秦數叛以罷行南秦州事罷至州召其魁帥爲腹心擊捕反者畧盡乃謂魁帥等曰汝黨皆死盡何用活爲乃以次斬之自是南秦無復反者又詔罷行秦州事尋遷車騎大將軍涇州刺史未及之部屬文帝徵兵爲勤王之舉罷請前驅効命遂爲大都督鎮華州魏孝武西遷拜車騎大將軍儀同三司別封萬年縣伯乃除華州刺史齊神武率軍進潼關人懷危懼罷勸勵將士衆心乃安神武

退拜驃騎大將軍加侍中開府嘗修州城未畢梯在城
外齊神武遣韓軌司馬子如從河東宵濟襲罷罷不覺
比曉軌衆已乘梯入城罷尚卧未起聞閣外洶洶有聲
便袒身露髻徒跣持一白挺大呼而出謂曰老罷當道
卧貉子那得過敵見之驚退逐至東門左右稍集合戰
破之軌衆遂投城遁走文帝聞而壯之時關中大饑徵
稅民間穀食以供軍實或有隱匿者令遞相告多被笞
捶以是人有逃散唯罷信著於人莫有隱者得粟不少

諸州而無怨讟沙苑之役齊神武士馬甚盛文帝以華州要衝遣使勞羆令加守備及齊神武至城下謂羆曰何不早降羆乃大呼曰此城是王羆冢生死在此欲死者來神武遂不敢攻後移鎮河東以前後功進爵扶風郡公河橋之戰王師不利趙青雀據長安城所在莫有固志羆乃大開州門召城中戰士謂曰如聞天子敗績不知吉凶諸人相驚咸有異望王羆受委於此以死報恩諸人若有異圖可來見殺必恐城陷沒者亦任出城

如有忠誠能與王羆同心可共固守軍人見其誠信皆無異心及軍還徵拜雍州刺史時蠕蠕渡河南寇候騎已至豳州朝廷慮其深入乃徵發士馬屯守京城塹諸街巷以備侵軼右僕射周惠達召羆議之羆不應命卧而不起謂其使曰若蠕蠕至渭北者王羆率鄉里自破之不煩國家兵馬何爲天子城中遂作如此驚動由周家小兒恇怯致此羆輕侮權勢守正不回皆此類也未幾還鎮河東羆性儉率不事邊幅嘗有臺使至羆爲設

食使乃裂去薄餅緣罷曰耕種收穫其功已深春爨造
成用力不少爾乃選擇當是未饑命左右撤去之使者
愕然大慙又有客與罷食瓜客削瓜皮侵肉稍厚罷意
嫌之及瓜皮落地乃引手就地取而食之客甚有愧色
性又嚴急有吏挾私陳事者罷不暇命捶撲乃手自取
鞞履持以擊之每至享會親自枰量酒肉分給將士時
人尚其均平強其鄙碎罷舉動率情不爲巧訐凡所經
處雖無當時功迹咸去乃見思大統七年卒于官贈太

尉都督相冀等十州刺史諡曰忠罷安於貧素不營產業後雖貴顯鄉里舊宅不改衡門身死之日家甚貧罄當時服其清潔子慶遠弱冠以功臣子拜直閣將軍先罷卒孫述字長述少孤爲祖罷所養聰敏有識度文帝見而奇曰王公有此孫足爲不朽解褐員外散騎侍郎封長安縣伯後爲鎮遠將軍拜太子舍人祖憂去職述初喪父爲罷所鞠養及居喪深合法度于時東西交爭金革方始羣官遭喪者卒哭之後皆令起視事述請終

禮制辭理懇切文帝令中使就視知其哀毀乃特許之
免喪襲爵扶風郡公除中書舍人修起居注改封龍門
郡公周受禪拜賓部下大夫累遷廣州刺史甚有威惠
朝議嘉之就拜大將軍後歷襄仁二州總管並有能名
隋文帝爲丞相授信州總管位上將軍王謙作亂遣使
致書於述述因執其使上書又陳取謙策文帝大悅前
後賜金五百兩授行軍總管討謙以功進位柱國開皇
初獻平陳計修營戰艦爲上流之師上善其能頻加賞

勞後數歲以行軍總管擊南寧未至而卒上甚傷惜之
贈上柱國冀州刺史諡曰莊子謨嗣謨弟軌大業末郡
守少子文楷起部郎

王思政字思政太原祁人漢司徒允之後也自魏太尉
凌誅後冠冕遂絕父祐州主簿思政容貌魁偉有籌策
魏正光中解褐員外散騎侍郎屬万俟醜奴宿勤明達
等擾亂關右北海王顥率兵討之聞思政壯健啓思政
隨軍事所有謀議並與思政參詳時魏孝武在藩素聞

其名顯軍還乃引爲賓客遇之甚厚及登大位委以心
膺遷安東將軍預定策功封祁縣侯爲武衛將軍俄而
齊神武潛有異圖帝以思政可任大事拜使持節中軍
大將軍大都督總宿衛兵思政乃言於帝曰高歡之心
行路所知洛陽四面受敵非用武之地關中有崤函之
固一人可禦萬夫且士馬精彊糧儲委積進可以討除
逆命退可以保據關河宇文夏州糾合同盟願立功効
若聞車駕西幸必當奔走奉迎藉天府之資因已成之

業一二年間習戰陣勸耕桑然後修復舊京何慮不克
帝深然之及齊神武兵至河北帝乃西遷進爵太原郡
公拜光祿卿并州刺史加散騎常侍大都督大統之後
思政雖被任委自以非相府之舊每不自安文帝曾在
同州與羣公宴集出錦罽及雜綾絹數千段命諸將撈
捕取之物既盡文帝又解所服金帶令諸人徧擲曰先
得盧者即與之羣公擲將徧莫有得者次至思政乃斂
容危坐而自誓曰王思政羈旅歸朝蒙宰相國士之遇

方願盡心効命上報知己若此誠有實令宰相賜知者
願擲卽爲盧若內懷不盡神靈亦當明之使不作也便
當殺身以謝所奉辭氣慷慨占對雄辯一坐盡驚卽拔
所佩刀橫於膝上攬捋蒲拊髀擲之比文帝止之已爲
盧矣徐乃拜而受帶自此之後文帝委寄更深轉驃騎
將軍募精兵從獨孤信取洛陽仍共信鎮之河橋之戰
思政下馬以長稍左右橫擊一擊輒踣數人時陷陣旣
深從者死盡思政被重創悶絕會日暮敵亦收軍思政

久經軍旅每戰唯著破弊之甲敵人疑非將帥故得免
有帳下督雷五安於戰處哭求思政會其已蘇遂相得
乃割衣裹創扶思政上馬夜久方得還軍仍鎮弘農除
侍中東道行臺思政以玉壁地在險要請築城即自營
度移鎮之遷汾晉并三州諸軍事并州刺史行臺如故
仍鎮玉壁八年東魏復來寇思政守禦有備敵人晝夜
攻圍卒不能克乃收軍還以全城功授驃騎大將軍開
府儀同三司高仲密以北豫州來附文帝親接援之乃

驛召思政將鎮成臯未至而班師復命思政鎮弘農思政入弘農令開城門解衣而卧慰勉將士示不足畏數日後東魏將劉豐生率數千騎至城下憚之不敢進乃引軍還於是修城郭起樓櫓營田農積芻秣凡可以守禦者皆備焉弘農之有備自思政始也十二年加特進兼尚書左僕射行臺都督荊州刺史境內旱濕城塹多壞思政乃命都督蘭小歡督工匠繕修之掘得黃金三十斤夜中密送之至旦思政召佐史以金示之曰人臣

不宜有私悉封金送上文帝嘉之賜錢二十萬思政之

去玉壁也文帝命舉代人思政乃進所部都督韋孝寬

其後東魏來寇孝寬卒能全城時論稱其知人十三年

侯景叛東魏擁兵梁鄭爲東魏所敗景乃請援乞師當

時未即應接思政以爲若不因機進取後悔何及即率

荊州步騎萬餘從魯關向陽翟文帝聞思政已發乃遣

太尉李弼赴潁川東魏將高嶽等聞大兵至收軍而遁

思政入守潁川景引兵向豫州外稱畧地乃密遣送款

於梁先是文帝遣帥都督賀蘭願德助景扞禦景既有
異圖因厚撫願德等冀爲已用思政知景詭詐乃密遣
追願德思政分布諸軍據景七州十二鎮文帝乃以所
授景使持節太傅大將軍兼尚書令河南大行臺河南
諸軍事回授思政思政並讓不受頻使敦喻唯受河南
諸軍事十四年拜大將軍九月東魏太尉高嶽行臺慕
容紹宗儀同劉豐生等率步騎十萬來攻潁川思政令
城內卧鼓偃旗若無人者嶽恃其衆謂一戰可圖乃四

面鼓譟而上思政選城中驍勇開門出戰嶽衆不能當
引軍亂退嶽知不可卒攻乃多修營壘又隨地勢高處
築土山以臨城中飛梯火車晝夜攻之思政亦作火礮
因迅風便投之土山又射以火箭燒其攻具賊乃退仍
募勇士縋而出戰嶽衆披靡據其兩土山置樓堞以助
防守齊文襄更益兵堰洧水以灌城時雖有恠獸每衝
壞其堰然城被灌已久多亦崩頽嶽悉衆苦攻思政身
當矢石與士卒同勞苦嶽乃更修堰作鐵龍雜獸用厭

水神堰成水大至城中泉湧溢不可防止懸釜而炊糧力俱竭慕容紹宗劉豐生及其將慕容永珍意以爲閑共乘樓船以望城內令善射人俯射城中俄而大風暴起船乃飄至城下城上以長鈎牽船弓弩亂發紹宗窮急透水而死豐生浮向土山中矢而斃生禽永珍獲船中器械思政謂永珍曰僕之破亡在於晷漏誠知殺卿無益然人臣之節守之以死乃流涕斬之并收紹宗等尸以禮埋瘞獄既失紹宗等心氣沮喪不敢逼城齊文

襄聞之率步騎十萬來攻自至堰下督勵士卒水壯城北面遂崩溢滿城中無措足之地思政知事不濟率左右據土山謂之曰吾受國重任本望平難立功精誠無感遂辱王命今力屈道窮計無所出唯當効死以謝朝恩耳因仰天大哭左右皆號慟思政西向再拜便欲自刎先是齊文襄告城中人曰有能生致王大將軍者封侯重賞若大將軍身有損傷親近左右皆從大戮都督駱訓謂思政曰公常語訓等但將我頭降非但得富貴

亦活得一城人今高相既有此言豈不哀城中士卒也因共止之不得引決齊文襄遣其通直散騎常侍趙彥深就土山遺以白羽扇而說之牽手以下及引見文襄辭氣慷慨涕淚交流無撓屈之容文襄以其忠於所事起而禮之接遇甚厚其督將分禁諸州地牢數年盡死思政初入潁川士卒八千人被圍既久城中無鹽腫死者十六七及城陷之日存者纔三千人既外無救援亦無叛者思政常以勤王爲務不營貲產嘗被賜園地思

政出征家人以種桑果雜樹及還見而怒曰匈奴未滅
去病辭家況大賊未平何事產業豈所謂憂公忘私邪
命左右拔而棄之故身陷之後家無畜積及齊文宣受
東魏禪以思政爲都官尚書儀同三司卒贈以本官加
兗州刺史初思政在荊州自武關以南延袤一千五百
里置三十餘城並當衝要之地凡所舉薦咸得其才子
康沈毅有度量後爲文帝親信思政陷後詔以因水城
陷非戰之罪增邑三千五百戶以康襲爵太原公除驃

騎大將軍侍中開府儀同三司康弟揆先封中都縣侯
增邑通前一千五百戶進爵爲公揆弟邗封西安縣侯
邗弟恭忠信縣伯恭弟幼顯親縣伯康姊封齊郡君康
兄元遜亦陷於潁川封其子景晉陽縣侯康抗表固讓
不許十六年王師東討加康使持節大都督以思政所
部兵皆配之魏廢帝二年隨尉遲迴征蜀鎮天水郡尋
賜姓拓王氏爲鄜州刺史武成末除匠師中大夫轉載
師保定二年歷安襄二州總管位柱國入隋終於汴州

刺史

尉遲迴字薄居羅代人也其先魏之別種號尉遲部因而氏焉父俟兜性弘裕有鑒識尚文帝姊昌樂大長公主生迴及綱迴年七歲綱年六歲俟兜病且卒呼二子撫其首曰汝等並有貴相但恨吾不見耳各宜勉之武成初追贈柱國大將軍太傅長樂郡公諡曰定迴少聰敏美容儀及長有大志好施愛士稍遷大丞相帳內都督尚魏文帝女金明公主拜駙馬都尉封西都侯大統

十一年拜侍中驃騎大將軍開府儀同三司進爵魏安
郡公十五年遷尚書左僕射兼領軍將軍迴通敏有幹
能雖任兼文武頗允時望文帝以此深委仗焉十六年
拜大將軍侯景之渡江也梁元帝時鎮江陵既以內難
方盛請修隣好其弟武陵王紀在蜀稱帝率衆東下將
攻之梁元帝大懼乃移書請救文帝曰蜀可圖矣取蜀
制梁在茲一舉乃與羣公會議諸將多有異同唯迴以
爲紀既盡銳東下蜀必虛空王師臨之必有征無戰文

帝深以爲然謂迴曰伐蜀之事一以委汝於是乃命迴督開府元珍乙弗亞侯呂陵始叱奴興綦連雄宇文昇等六軍甲士一萬二千騎萬匹伐蜀以魏廢帝二年春自散關由固道出白馬趣晉壽開平林舊道迴前軍臨劔閣紀安州刺史樂廣以州先降紀梁州刺史楊乾運時鎮潼州先已遣使詣闕密送誠款然恐其下不從猶據潼水別營拒守迴遣元珍侯呂陵始等襲之乾運還保潼州珍等遂圍之乾運降迴至潼州大饗將士渡涪

江至青溪登南原勒兵講武修繕約束閱器械自開府
以下賞金帛各有差時夏中連雨山路險峻將士疲病
者十二三迴親自勞問加以湯藥引之而西紀益州刺
史蕭撫嬰城自守進軍圍之初紀至巴郡遣前南梁州
刺史史欣景幽州刺史趙跋扈等爲撫外援迴分遣元
珍乙弗亞等擊破之跋扈等遁走欣景遂降撫被圍五
旬頻戰爲迴所破遣使乞降許之撫乃與紀子宜都王
圓肅率其文武官屬詣軍門請見迴以禮接之其吏民

等各令復業唯收僮隸及儲積以賞將士號令嚴肅軍
無私焉詔以迴爲大都督益潼等十二州諸軍事益州
刺史三年加督六州通前十八州諸軍事以平蜀功封
一子爲安固郡公自劔閣以南得承制封拜及黜陟迴
乃明賞罰布恩威綏緝新邦經畧未附民夷懷而歸之
迴性至孝色養不怠身雖在外所得四時甘脆必先薦
奉然後敢嘗大長公主年高多病迴往在京師每退朝
參候起居憂悴形於容色大長公主每爲之和顏進食

以寧迴心文帝知其至性徵迴入朝以慰其母意遣大鴻臚郊勞仍賜迴袞冕之服蜀人思之爲立碑頌德六官初建拜小宗伯孝閔踐阼進位柱國大將軍又以迴有平蜀之功同霍去病冠軍之義改封寧蜀公遷大司馬尋以本官鎮隴右武成元年進封蜀國公邑萬戶除秦州總管秦渭等十四州諸軍事隴右大都督保定二年拜大司馬及晉公護東伐迴帥師攻洛陽齊王憲等軍於芒山齊衆渡河諸軍驚散迴率麾下反行却敵於

是諸將遂得全師而還遷太保太傅建德初拜太師尋加上柱國宣帝即位以迴爲大右弼轉大前疑出爲相州總管宣帝崩隋文帝輔政以迴位望夙重懼爲異圖乃令迴子魏安郡公惇齎詔書以會葬徵迴尋以郕公韋孝寬代迴爲總管迴以隋文帝當權將圖篡奪遂謀舉兵留惇而不受代隋文帝又令候正破六韓裒詣迴喻旨密與總管府長史晉昶等書令爲之備迴聞之殺昶乃集文武士庶登城北樓而令之於是衆咸從命莫

不感激乃自稱大總管承制署官司于時趙王招已入
朝留少子在國迴又奉以號令迴弟子大將軍成平郡
公勤時爲青州總管初得迴書表送之尋亦從迴迴所
管相衛黎毛洛貝趙冀瀛滄勤所統青齊膠光莒諸州
皆從之衆數十萬榮州刺史邵國公宇文胄申州刺史
李惠東楚州刺史費也頭利進國東潼州刺史曹孝達
各據州以應迴徐州總管司錄席毗與前東平郡守畢
義緒據兗州及徐州之蘭陵郡亦以應迴永橋鎮將紇

豆陵惠以城降迴迴又北結高寶寧以通突厥南連陳
人許割江淮之地隋文帝於是徵兵討迴即以韋孝寬
爲元帥陰羅雲監諸軍邴國公梁士彥樂安公元諧化
政公宇文忻濮陽公宇文述武鄉公崔弘度清河公楊
素隴西公李詢延壽公于仲文等皆爲行軍總管迴遣
所署大將軍石孫攻建州刺史宇文弁以州降孫迴又
遣西道行臺韓長業攻陷潞州執刺史趙威署城人郭
子勝爲刺史上儀同赫連士猷攻晉州即據小鄉城紇

豆陵惠襲陷定州之鉅鹿郡遂圍恒州上大將軍宇文
威攻汴州上開府莒州刺史烏尼九開府尉遲雋率光
膠青齊莒兗之衆圍沂州大將軍檀讓攻陷曹亳二州
屯兵梁郡大將軍東南道行臺席毗衆號八萬軍於蕃
城攻陷昌慮下邑豐縣李惠自申州攻陷永州焚之而
還宇文胄軍於洛口開府梁子康攻懷州魏安公惇率
衆十萬人入武德軍於沁東孝寬等諸軍隔水相持不
進隋文帝又遣高穎馳驛督戰惇布兵二十餘里麾軍

少却欲待孝寬軍半度而擊之孝寬因其却而鳴鼓齊進惇遂大敗孝寬乘勝進至鄴迴與其子惇祐等又率其卒十三萬陣於城南迴別統萬人皆綠巾錦襖號曰黃龍兵勤率衆五萬自青州赴迴以三千騎先到迴舊習軍旅雖老猶被甲臨陣其麾下兵皆關中人爲之力戰孝寬等軍失利而却鄴中士女觀者如堵高頰與李詢乃整陣先犯觀者因其擾而乘之迴衆大敗遂入鄴城迴走保北城孝寬縱兵圍之李詢賀樓子幹以其屬

先登迴上樓射殺數人乃自殺勤惇祐等東走青州未
至開府郭衍追及之並爲衍所獲隋文帝以勤初有誠
款釋之李惠先是自縛歸罪隋文帝復其官爵迴末年
衰老感於後妻王氏而諸子多不睦及起兵以開府小
御正崔達拏爲長史自餘委任亦多用齊人達拏文士
無籌畧舉止多失綱紀不能匡救迴自起兵至于敗凡
經六十八日馬子寬大將軍長樂郡公先迴卒寬兄誼
開府資中郡公寬弟順以迴平蜀功授開府安固郡公

後以女爲宣帝皇后拜上柱國封胙國公順弟惇軍正
下大夫魏安郡公惇弟祐西都郡公皆被誅而誼等諸
子以年幼並獲全唐武德中迴從孫庫部員外郎耆福
上表請改葬朝議以迴忠於周室有詔許焉仍贈絹百
疋迴弟綱字婆羅少孤與迴依託舅氏文帝西討關隴
迴綱與母昌樂大長公主留于晉陽後方入關從文帝
征伐常陪侍帷幄出入卧內以軍功封廣宗縣伯綱驍
果有膂力善騎射文帝甚寵之委以心膂河橋之戰文

帝馬中流矢因而驚奔綱與李穆等左右力戰衆皆披靡文帝方得乘馬大統十四年進爵平昌郡公廢帝二年拜大將軍兼領軍及魏帝有異謀言頗漏泄文帝以綱職典禁旅使密爲之備俄而廢帝立齊王仍以綱爲中領軍總宿衛綱兄迴伐蜀從文帝送之於城西見一走兔文帝命綱射之誓曰若獲此兔必當滅蜀俄而綱獲兔而返文帝喜曰事平當賞汝佳口及克蜀賜綱侍婢二人又嘗從文帝北狩雲陽見五鹿俱走綱獲其三

每從遊宴文帝以珍異之物令諸功臣射而取之綱所獲輒多孝閔帝踐阼綱以親戚掌禁兵除小司馬又與晉公護廢帝明帝即位進位柱國大將軍武成元年進封吳國公邑萬戶除涇州總管歷位少傅大司空陝州總管晉公護東討乃配綱甲士留鎮京師大軍還綱復歸天和二年以綱政績可紀賜帛及錢穀等增邑以褒賞之陳公純等以皇后阿史那氏自突厥將入塞詔徵綱與大將軍王傑率衆迎衛於境首三年追論河橋功

封一子縣公四年薨于京師贈太保諡曰武第二子安以嫡嗣大象末位柱國入隋歷鴻臚卿左衛大將軍安兄運運少彊濟志在立功魏大統十六年以父勲封安喜縣侯明帝立以預定策勲進爵周城縣公歷位隴州刺史再遷武伯中大夫尋加軍司馬運既職兼文武甚見委任進爵廣業郡公轉右司衛時宣帝在東宮親狎諂佞數有罪失武帝於朝臣內選忠諒鯁正者以匡弼之於是以運爲右宮正建德三年帝幸雲陽宮又令運

以本官兼司武與長孫覽輔皇太子居守俄而衛刺王直作亂率其黨襲肅章門覽懼走行在所運時偶在門中直兵奄至不暇命左右乃手自闔門直黨與運爭門斫傷運指僅而得閉直既不得入乃縱火運恐火盡直黨得進乃取宮中材木及牀等以益火更以膏油灌之火轉熾久之直不得進乃退運率留守兵因其退以擊之直大敗而走是夜微運宮中已不守矣武帝嘉之授大將軍賜以直田宅妓樂金帛車馬什物等不可勝數

四年出爲同州刺史同州蒲津潼關等六防諸軍事帝將伐齊召運參議東夏底定頗有力焉五年拜柱國進爵盧國公轉司武上大夫總宿衛軍事帝崩於雲陽宮祕未發喪運總侍衛兵還京師宣帝即位授上柱國運之爲宮正也數進諫於帝帝不納反疎忌之時運又與王軌宇文孝伯等皆爲武帝親待軌屢言帝失於武帝帝謂運預其事愈更銜之及軌誅運懼及於禍尋而得出爲秦州總管至州猶懼不免遂以憂薨於州贈大後

丞七州諸軍事秦州刺史諡曰忠子靖嗣運弟勤大象末青州總管起兵應伯父迴勤弟敬尚明帝女河南公主位儀同三司

王軌太原祁人也小名沙門漢司徒允之後世爲州郡冠族累葉仕魏賜姓烏丸氏父光少雄武有將帥材畧頗有戰功文帝遇之甚厚位至驃騎大將軍開府儀同三司平原縣公軌性質直慷慨有遠量臨事彊正人不敢干起家事輔城公及武帝即位頗被識顧累遷內史

下大夫自此遂處腹心之任晉公護專政武帝密圖之以軌沈毅有識度堪屬大事遂問以可否軌贊成之建德初轉內史中大夫加授開府儀同三司又拜上開府儀同大將軍封上黃縣公軍國之政皆參預焉五年武帝親戎東伐軌從克晉州平并鄴以功進位上大夫將軍進爵鄴國公及陳將吳明徹入寇呂梁徐州總管梁士彥頻與戰不利乃退保州城明徹遂堰清水以灌之列船艦於城下以圖攻取詔以軌爲行軍總管率諸軍

赴救軌潛於清水入淮口多豎大木以鐵鎖貫車輪橫截水流以斷其船路方欲密決其堰以斃之明徹知之大懼乃破堰遽退冀乘決水之勢以得入淮比至清口川流已濶水勢亦衰船艦並礙車輪不復得過軌因率兵圍而感之唯有騎將蕭摩訶以一十騎先走得免明徹及將士三萬餘人并器械輜重並就俘獲陳之銳卒於是殲焉武帝嘉之進位柱國仍拜徐州總管七州十五鎮諸軍事軌性嚴重善謀畧兼有呂梁之捷威振敵

境陳人甚憚之宣帝之征吐谷渾也武帝令軌與宇文孝伯並從軍中進趣皆委軌等宣帝仰成而已時宮尹鄭譯王端等並得幸於宣帝宣帝在軍中頗有失德譯等皆預焉軍還軌等言之於武帝武帝大怒乃撻宣帝除譯等名仍加捶楚宣帝因此大銜之軌又嘗與小內史賀若弼言及此事且言皇太子必不克負荷弼深以爲然勸軌陳之軌後因侍坐乃白武帝曰皇太子仁孝無聞又多涼德恐不了陛下家事愚臣暗短不足以論

是非陛下常以賀若弼有文武奇才識度弘遠而弼比再對臣深以此事爲慮武帝召弼問之弼乃詭對曰皇太子養德春宮未聞有過未審陛下何從得聞此言既退軌誚弼曰平生言論無所不道今者乃爾翻覆弼曰此公之過也皇太子國之儲嗣豈易發言事有差跌便至滅門之禍本謂公密陳臧否何得遂至昌言軌默然久之乃曰吾專心國家遂不存私計向者對衆良實非宜其後軌因內宴上壽又將武帝鬚曰可愛好老公但

恨後嗣弱耳武帝深以爲然但漢王次長又不才此外
諸子並幼故不能用其說及宣帝即位追鄭譯等復爲
近侍乃出軌爲徐州刺史軌自知必及於禍謂所親曰
吾昔在先朝實申社稷至計今日之事斷可知矣此州
控帶淮南隣接彊寇欲爲身計易同反掌但忠義之節
不可虧違况荷先帝厚恩每思以死自効豈以獲罪於
嗣主便欲背德於先朝止可於此待死義不爲他計冀
千載之後知吾此心大象元年帝令內史杜虔信就徐

州殺軌御正中大夫顏之儀切諫帝不納遂誅之軌立朝忠恕兼有大功忽以無罪被戮天下知與不知莫不傷惜時京兆郡丞樂運亦以直言數諫於帝

樂運字承業南陽滎陽人晉尚書令廣之八世孫也祖文素濟南郡守父均梁義陽郡守運少好學涉獵經史年十五而江陵滅隨例遷長安其親屬等多被籍沒運積年爲人傭保皆贖免之事母及寡嫂甚謹由是以孝聞梁故都官琅邪王澄美之次其行事爲孝義傳性方

直未嘗求媚於人臨淄公唐瑾薦之自柱國府記室爲
露門學士前後犯顏屢諫武帝多被納用建德二年除
萬年縣丞抑挫豪右號稱彊直武帝嘉之特許通籍事
有不便於時者令巨細奏聞武帝嘗幸同州召運赴行
在所既至謂曰卿言太子如何人運曰中人也時齊王
憲以下並在帝側帝顧謂憲等曰百官佞我皆云太子
聰明睿智唯運云中人方驗運之忠直耳於是因問中
人之狀運對曰班固以齊桓公爲中人管仲相之則霸

豎刁輔之則亂可與爲善亦可與爲惡也帝曰我知之矣遂妙選宮官以匡弼之乃超拜運京兆郡丞太子聞之意甚不悅及武帝崩宣帝嗣位葬訖詔天下公除帝及六宮便議即吉運上疏曰三年之喪自天子達於庶人先王制禮安可誣之禮天子七月而葬以候天下畢至今葬期既促事訖便除文軌之內奔赴未盡隣境遠聞使猶未至若以喪服受弔不可既吉更凶如以玄冠對使未知此出何禮進退無據愚臣竊所未安書奏帝

不納自是德政不修數行赦宥運又上疏曰臣謹按周
官曰國君過市則刑人赦此謂市者交利之所君子無
故不遊觀焉則施惠以悅之也尚書曰眚災肆赦此謂
過誤爲害罪雖大當緩赦之謹尋經典未有罪無輕重
溥天大赦之文故管仲曰有赦者奔馬之委轡不赦者
瘞疽之礪石又曰惠者人之仇讐法者人之父母吳漢
遺言猶云唯願無赦王符著論亦云赦者非明世之所
宜有大尊豈可數施非常之惠以肆姦宄之惡乎帝亦

不納而昏暴滋甚運乃輿櫬詣朝堂陳帝八失一曰內
史御正職在弼諧皆須參議共理天下大尊比來小大
之事多獨斷之堯舜至聖尚資輔弼况大尊未爲聖主
而可專恣已心凡諸刑罰爵賞爰及軍國大事請參諸
宰輔與衆共之二曰內作色荒古人重誠大尊初臨四
海德惠未洽先搜天下美女用實後宮又詔儀同以上
女不許輒嫁貴賤同怨聲溢朝野請姬媵非幸御者放
還本族欲嫁之女勿更禁之三曰天子未明求衣日旰

忘食猶恐萬幾不理天下壅滯大尊比來一入後宮數
日不出所須聞奏多附內豎傳言失實是非可懼事由
宦者亡國之徵請準高祖居外聽政四曰變故易常乃
爲政之大忌淫刑酷罰非致安之弘規若罰無定刑則
天下皆懼政無常法則義無適從豈有削嚴刑之詔未
及半祀便即追改更嚴前制政令不定乃至於此今宿
衛之官有一夜不直者罪至削除因而逃亡者遂便籍
沒此則大逆之罪與杖十同科雖爲法愈嚴恐人情愈

散一人心散尚或不可止若天下皆散將若之何請遵
輕典並依大律則億兆之民手足有所措矣五曰高祖
斷雕爲朴本欲傳之萬世大尊朝夕趨庭親承聖旨豈
有崩未踰年而處躬奢麗成父之志義豈然乎請興造
之制務從卑儉雕文刻鏤一切勿營六曰都下之人徭
賦稍重必是軍國之要不敢憚勞豈容朝夕徵求唯供
魚龍爛漫士庶從役祇爲俳優角抵紛紛不已財力俱
竭業業相顧無復聊生凡無益之事請並停罷七曰近

見有詔上書字誤者即科其罪假有忠謹之人欲陳時

事尺有所短文字非工不密失身義無假手脫有舛謬

便迫嚴科嬰徑尺之鱗其事非易下不諱之詔猶懼未

來更加刑戮能無鉗口大尊縱不能採誹謗之言無宜

杜獻替之路請停此詔則天下幸甚八曰昔桑穀生朝

殷王因之獲福今元象垂戒此亦興周之祥大尊雖減

膳徹懸未盡消譴之理誠願諮諏善道修布德政解兆

庶之愠引萬方之罪則天變可除鼎業方固大尊若不

革茲八事臣見周廟不血食矣帝大怒將戮之內史元
巖諫而獲免翌日帝頗感悟召運謂之曰朕昨夜思卿
所奏實是忠臣先皇聖明卿數有規諫朕既昏暗卿復
能如此乃賜御食以賞之朝之公卿初見帝甚怒莫不
爲運寒心後見賞獲又皆相賀以爲幸免虎口內史鄭
譯常以私事請託運不之許因此銜之及隋文帝爲丞
相譯爲長史遂左遷運爲廣州渚陽令開皇五年轉毛
州高唐令頻歷二縣並有聲績運嘗願處一諫官從容

諷議而性訐直爲人所排抵遂不被任用乃發憤錄夏
殷以來諫諍事集而部之凡六百三十九條合四十一
卷名曰諫苑奏上之隋文帝覽而嘉焉



通志卷一百五十六



總校官庶吉士臣侍朝

校對官庶吉士臣陳文樞

謄錄監生臣魏綿曾